


I KIKÓLE

 . . . ukubala kwa Lisyu. Ku bulũmbilili ubwãkwĩgala, inongwa iyi une mbasũmĩle umwe ukwĩma. . . Akabalilo kãko abẽne bikukupã *Indembela Yandondwa-Imwekuke*, umwe mukwĩma. Ngimba umwe mukubõmba? [Ikilundilo kikuyoba, “Ena.”—Nsimbi.] Polelo bule lẽlo i Lisyu lya Kyala? Ulwẽne lo luyĩndiko. Lilino mwa Buku gwa Úkusoka, untu gwa 12, ukwanda pa linandi lya 12, Une ngulõnda ukubala akayabo ka Lisimbo, gwa 12 pangĩ ilinandi lya 13.

Kabuno Une nisakukilania ukukĩnda nkĩsu kya Igupti ikili iki, kangi ngwisakutika . . . ugwakĩpanda nkĩsu kya—kya Igupti, fyõsa umũndu ni kinyamana; kangi . . . nisakubõmbãgã ubulõngi: Une ne NTWA.

Kangi ililopa lisakuyaga kwa umwe ukuya kikole pa nyumba mũmo umwe muli; kangi akabalilo kãko Une ngukẽta ililopa, Une nisakukilaniaga pa umwe, kangi umpyũto utisakuya pa umwe mma ukubõnãnga umwe, akabalilo kãko une ngutika ikisu kya Igupti.

2 Ikimanyisyo kyãngu kyo: *I Kikole*.

3 Unko uswe twinamisye imitu gyitu lilino. Kangi nkimyemye Kyãke kya kabaloli akakemesĩgwe aka, bo tukãli ukusegelela ku Mwẽne ndwĩpũto, ngima bulipo ubusũme ubu umwe mubagile ukunyonywa ukuti Kyãla ãmũle pamusi apa? Itolo fyũsya amaboko gĩnu linga umwe mukulõnda, kangi inogona pãsi pa ndumbula syĩnu iki umwe mukulõnda Umwẽne abõmbe. Kulikõsa nkiyũmba, itolo inogona iki umwe mukulõnda Umwẽne abõmbe.

4 Tata gwitu Gwakumwanya, Ugwe gwe Kyala nsitakwãndũka, kangi uswe tukusuma ukuti Ugwe kwãmulaga inyiputo syĩtu, pamusi apa, bo—bo uswe tukukolelela amabõka gĩtu. Kangi Ugwe kukẽtésya ukuti amaboko gãngu gali mmwanya, gõpe. Kangi ubusume bwãngu, une ngubutẽndekãga ubwẽne bumanyigwe pakilũndĩlo, uko kokuti, Ntwa, ukuti Ugwe kwĩsa kubũmbulũsyaga umũndu aligwesa nkati mũno umwĩsyũgu, ukupoka aligwesa unjõnge yula. Lilino, Ugwe gwãyobĩle, “Linga umwe mukunsuma Tãta kalikõsa, mu Ngamu Yangu, Une nisakubõmba ikyẽne.” Lilino, Ntwa, tutula uswe palikimo ukwitika ukuya bumobwẽne bwa bãndu, ubwa bãna bãkwitika. Yoba ukwisila mu Lisyu Lyako, Ntwa. Ilisyu Lyako lyo Bwanaloli. Sayaga indumbula syitu.

5 Uswe tukupalisya Ugwe panongwa ya lukomano ulu. Uswe tukupãlisya Ugwe panongwa ya Nkundwe Grant, kangi panongwa ya bõsa ba babõmbi bãke, kangi ifipãnga fyõsa na bãndu. Kangi panongwa sya fyosa ifi Ugwe ubobile kuli uswe,

Ntwa, uswe tukupalisya kwa Ugwe. Tāta, lumo tulipo bīngi ba uswe apa tutisakubonanamo kangī siku yumo nu nnine kangī lilino, mpaka uswe tukukēta ulubafu ulungi. Ubu bubagīle ukuya bulūmbilili ubwabumalikisyo ubu uswe twisakwitugāsyā palikimo nkīsu iki. Mbepo Mwikemo alīsaga nukutusaya uswe palikimo, ukutubōmbela uswe ififumbilwe fyītu. Mu Ngamu ya Yeso uswe tukusuma. Ameni.

Mulitugasyaga.

⁶ Une ndinako akanini akapātu ka kalatasi apa, une ngusimba mōsa a Masimbo gāmo ni findu ifinini. Nālisibīle ukuti une nābagīle ukukumbukila ikyēne mu linogono lyāngu, lōli une ngindile itolo malongo mabili-na-fihano, umwe mumenye, uko kokuti, akābubili. Kangī polelo une ndikukūmbukila ngati mūmo une nālisibīle mma, kangī fingi fiyo fikumalikila mu ngomano ni findu, kangī ifingi fiyo ifyakubōmba.

⁷ Ikimanyisyo kyītu pamusi apa kyo: *I Kikōle*. Ubuyo bwitu bukwiguka pa Igupti. Ikyēne kipīcha ikikulumba apa lilino, une ngulōnda umwe mwēsa ukukibona ikyēne kangī yaga itolo baluyīndiko mūmo umwe mubagīle. Igupti bo buyo bwa kyakuboneka iki, kangī akabalilo ka kyākuboneka kyo itolo ku bwāndilo bwa kusōka.

⁸ Kangī, lilino, ikyēne kyo kyākwēgelela kya mwīsyūgu, kibonesigwe, bo uswe nūswe tukulinako ukusōka ukūngi pankyeni pitu. Kyala ikuntwala Israeli ukufuma ku Igupti, ukubūka ku kisu ikifingigwe, kyāli kya kwēgelēla kya Kristi ukuntwala u Nsīngiligwa ukufuma nkipānga, ukubuka ku Kīsu ikifingigwe. Uswe tuli mu kusōka ukūngi. Lilino linga umwe mukufūndaga i Lisimbo, uswe tuli nakabalilo itolo ukutika utubuyo utwapamwanyapo utwa ikyēne, ikyo kyo kyābwanalōli. Uswe tuli... Bo mūmo Kyāla ātwēle ikikolo ukufuma ku kikolo, Kyāla isakutwala u Nsīngiligwa ukufuma ku kipanga. U Nsīngiligwa isakukōleligwa ukufuma ku fipānga fyōsa. Umwēne isakuyaga nsaligwa gwa Kyāla, bisakusōsigwa pānja. Kangī uswe tuli pa bwēmbē bwa kusōka kula papapa apa, kabuno uswe tuli nu busisimikisye bulibōsa Bwalisimbo ukuti uswe twīmīle pala. Lilino, une mmenye ikyo kiyobīgwe akabalilo kīngi fiyo, lōli, mwīnangu, akabalilo kamo ikyēne kisakuyobigwaga ku kabalilo kabumalikisyo. Akabalilo kisakusimilila mwa Syēpwa kokuti. Umwēne ikwīsa ukwēga u Nsīngiligwa ukufuma nkipānga.

⁹ Ikikole kyāli kyo kīndu iki kyāpelaga ubukīndane pakati pa Igupti na Israeli, ifikolo fibili. Abēne bo bōsa bāndu ba būndu, lōli bōsa bapeligwa-na-Kyāla, bōsa mbombo ya maboko ya Kyāla, lōli, ukukīndana kwa lufūndo lwa bufwe lwātumuligwe, ukukīnda pakati pa būmi nu bufwe bwāli kikōle.

¹⁰ Kangī mūmo kwisakuyīlāga ku bwīsilo bwa Mwanundumiana gwa Kyāla, akabalilo kāko Umwēne ikutwala

u Nsingilígwa panja pa kipanga, ukukindana kwisakuyaga Kikole. Lilino, pilikisya kifuki pamusi apa, kangi mukete linga isyo sikaya bwanaloli. I Kikóle kisakuyaga kukindána. Pikufimbilisigwa ukuyapo ukukindána.

¹¹ Kyala isakuyaga ndongi gwa kisu, ilisiku limo. Linga une nabalalusisye abandu ba kiKatolika, “Ywani Umwene isakulongaga, ngimba fiki ifi Umwene isakulongelaga ikisu?” Abene babagile ukuyoba, “I kipanga.” Kyo kipanga kiki? “Ikipanga kya Katolika.” Ikipanga kya Katolika kiki? Filipino fingipo ifya fyene. AbaMethodisti babagile ukuyoba, “Ukwisila mu kiMethodisti,” abaBaptisti polele bali panja pa ikyene. Polele, linga ugwe kulonga ikyene ukwisila mu kipanga kya Baptisti, fyosa ifya ifyene fili panja. AbaPentekosti bikuyoba, “Ukwisila mu Pentekosti,” polele ifingi fya ifyene fili panja. Muketile, ikyene kikuyaga ku bufuluganiko, ubufuluganiko ubwingi fiyo, ulufuluganiko lwingi fiyo ku linogono, ukwilogona ikya kindu bo iki.

¹² Loli Kyala ali njila apa iyi Umwene aayobile Umwene isakulongaga abandu, komma ukwisila mu kipanga kya Katolika, komma ukwisila mu kipanga kya kiProtestanti. Loli Umwene isakulongaga abandu ukwisila mwa Yeso Kristi, kangi Yeso yo Lisyu, polelo pala ikylene kikwisa ku i Bängéli kangi. Muketile? Umwene isakulongaga abandu ukwisila mu i Bängéli. Kangi ili Bängeli lya Buku lya bulongo lya Kyala, iki kyo nu busetuli losa bwa Yeso Kristi, ukuti nakimo ikingi kibagile ukongeligwa pamo kalikosa ukwegigwamo ukufumu mu Lyene; ulufundo lwa kubomba ikyene, lo ngamu yako ukusosisgwamo mwa Buku gwa Bumi. Itolo itugasya mulamula mwa Buku, kangi iputa Kyala ukututendeka uswe ukuya kiyabo kya Ikyo.

¹³ Lilino uswe tukusyaagania, ikikole, ngimba ikikole kyo fiki? Ikikole kyo kimanyilo kya ntengo unhombigwe. Itolo bo gi misebwe gya sitima na mabaasi, uswe tukweega ihela syiitu nukubuuka ku bukatilo-matikiti. Lilino, muketile, i kampuni ya baasi yitikwiitikisigwa, mmabuyo muumo ifikole fikubombeligwa imbombo, abeene batikwiitikisigwa ukweega ihela. Abeene bakabagila ukweega ihela, ikyeene kikweegela ikikole; tutigi, indeege, kilikyosa ikingi. Ugwe kubuuka ku buyo bumu, pakigemo ikyabuulikisyo, nukuula, ukufuma ku hela yaako, ifikole ifingi bo luulo, ikikole iki kimo. Kangi ikikole iki kyo kimanyilo ukuti untengo gwaako guhombigwe. Ugwe guli nu bwaabuke ukwiitoga i sitima, ukwiitoga indeege, ukwiitoga mu baasi, pamo kilikyosa ikylene kyo kili, akabalilo kalikoosa ugwe kukolelela ikikole ukunaangisya ukuti ubwaako—ukuti ubwaako ubwitoge buhoombigwe. Lilino kumbukilaga ikyo. Komma ukwiibwa ikyeene.

¹⁴ Akang’osi ka Israeli akabuutigwa kaali i...kaali bulondigwe bwa Kyaala. Yehova aalondaga kang’osi umbuutigwe, ikyakwingilapo ikisitabusobi. Muno uswe

tukindilemo mu kyeene mu ndungu ugu gukindilepo lilino, ukuti Kyaala, akabalilo ikutumula inongwa, Umweene atikwandalamo ilyeene. Kangi Umweene aatendiike injila, ikindu Kyaake ikyakwanda akabalilo kaako u muundu aagwiile, Umweene alinkufimbilisigwa ukuteendeka injila kuli umweene ukugomokela, linga Umwene aalondilemo siku ukuntabula umweene, kangi Umweene alinkutumula inongwa ukuti Umweene aapokile u muundu ukwisila mu Lilopa lya u nsitabusobi Yula. Kangi Umweene aabombile kwabwilanabwila ikindu kilakila. Umweene akandulamo siku ikyeene. Nabumo ubuyo paapo u Kyaala isakwaganamo siku mu mwiipuuti, pene paasi pa Lilopa. Ubo bo bweene buyo Bwaake.

¹⁵ Uswe tukugela ukunteendeka Umweene ukwaagana paasi pa bufundakyala bwiiu, paasi pa kipanga-kipaaguke kyiiu, paasi pa mbaatiko sya bumanyi syiiu. Bamo bayengile imiyumba imitali kangi bamo bayengile utwaaya, Babeloni kangi—kangi iliyumba ilitali lya Babelo, nu luko ulukiindane ulwa findu. Looli ikyeene kikaali kikusyaala, Kyaala peene ikwaagana nu mwiipuuti paasi pa Lilopa. Umwene atikwandukamo siku. Uswe tukabagila twesa ukuya baMethodisti, uswe tukabagila ukuya tweesa baPentekosti, uswe tukabagila tweesa ukuya *iki, kila*, pamo *ikingi*, uswe twisakukanikanga. Looli ling aune ngwiisa ku muundu, ndeke umweene ayege mpuuti gwa Katolika pamo kilikyosa kali umweene ali, akabalilo kaako umweene ali paasi pa Lilopa uswe twe bakundwe, ndikupaasya kuuko umweene ali, akabalilo kosa umweene ali paasi pa Lilopa.

¹⁶ Lilino, u kang'osi umbuutigwe gwa Israeli aali yo kulondigwa gwa Yehova, kangi i lilopa lyaali kikole ukuti imbombo yaabombigwe. Kyaala alondaga kuli butabulo, ukufuma ku Igupti, ukubuuka ku kisu ikifingigwe, Umweene aalondigwaga ikinyamana ikibuutigwe. Kangi ikinyamana kila kyabagilile ukuya . . . Ililopa lya kinyamana ikifwano lyabagilile ukubiikigwa pamwanya pa kifigo kangi pa kifigo, kangi kila kimililaga ukuya kikole ukuti ikindu iki Yehova aakiloondaga kyafwanikisiigwe. Muketile? Lilino, komma u kang'osi aali kikole, ililopa lyaali kikole. Lilino, ubuumi bwaasokilemo ukufuma mu likemo, kangi lilino ililopa lyaali kikole. Indagilo Syaake syaabombeliigwe imbombo. Ililopa lyaalimile mbuyo bwa kikole, ikimanyilo ukuti umwitiki uyu aabombile katikati iki kyaali kyakulondigwa. Kila kyaali kikiikole. Syoosa kanunu, ukumbona umwitiki, ikwiipuuta, aalinganisiigwe ni likemo lyaake. Muketile?

¹⁷ *Apa yilipo i nyumba, kangi umwiipuuti, ngimba ikyaakulondigwa kyaali fiki? "Buuta u kang'osi. Pisiku lya kalongo na buna ukufuma paapo iyeene yaabiikigwe pala, i—i nyaambala kisita kilema, Israeli gweesa isakubuutaga iyeene,*

kangi ililopa lisakwegigwaga ni liisu ya hisopu nukubiikigwa pamwanya pa kifigo.”

¹⁸ Kangi, mulimosa, u hisopu yula lyaali liisu lyapaliposa. *Hisopu* kokuti “ulwiitiko lwaako.” Umundu yumo ikugela ukuya nu lwiitiko ulukindakipeligwa, iyo yo nongwa umwe mukupondwa ububumbulusyo bwiinu. Ulwiitiko lo itolo kindu kyapaliposa. Ugwe uli nu lwiitiko ukwiisa ku kipanga. Ugwe uli nu lwiitiko ukweenda panja pala. Ugwe uli nu lwiitiko ukukina iligali lyaako. Ugwe uli nu lwiitiko ukulya ifyakulya. Iyo yo njila ulweene luli, itolo lwiitiko lyapaliposa. Lilino ukupaka ililopa, lyapakigwaga nu hisopu, ili lyo liisu ilyapaliposa ili likukula paliposa mu Palestina, ukunangisya ukuti u lwiitiko ulu ililopa libagiile ukupakigwa nalyo likaya kindu kimo ikyapamwanya ukukinda mma ugwe kufimbilisigwa ukuya nu luko losa lwa digiri ya dokotala ukuboomba ikyeene. Ulweene lo itolo lwapaliposa, lwiitiko lwa lisiku lililyosa, ukwiitika Kyaala. Muketile? “Paka ililopa,” ukwisila mu lwiitiko, “na hisopu.”

¹⁹ Lilino, u mwiipuuti, Polelo, aaketaga paasi pa lilopa, aanaanngisye ukuti umweene aaboombile ukuloonda kwa Yehova, kangi umweene aalinganisiigwe. Ikikole kyaanagiisye umweene aalinganisiigwe nu kang’osi umbuutigwe iyi Yehova aalondile. Imbombo yaaboombigwe. Kyo kyaakwegelela ikipelelesye nki umwiisyuugu, ikya Kristi nu mwiitiki. Akabalilo kaako u Kikole abonesigwe ku mwiitiki, polelo Ikyeene kikunaangisya ukuti ikyeene kytikisiigwe kangi imbombo yiboombigwe.

²⁰ Polelo, ililopa lyaali kikole kya bulinganio, ililopa lyeene. Ikinyamana kilinkusooka ililopa, kilinkufwa, kangi ililopa lyaake lyaali pa kibumba. Lilino, ubuumi bwa kinyamana, bula bwaali mu lilopa. Kangi ubuumi buli mu lilopa, uswe tumenye ikyo. Ili Baangeli lyaayobile luulo, kangi u sayansi ikusisimikisya ikyeene, ubuumi buli mu lilopa. Popaapo polelo akabalilo kaako ikinyamana kyaagogigwe, kangi ubuumi bwapufuliigwe ukufuma ku kinyamana, ililopa lyaali ni nkemo gwa lilopa, ukwimila ikikole. Panongwa yakuti, ubuumi ubu bwaali mu lilopa bukaabagiile ukugomokela pa mwiitiki, panongwa yakuti ubweene bwaali buumi bwa kinyamana.

²¹ Kangi ubuumi bwa kinyamana kimo kangi ubuumi bwa buundu fikindene loosa. Bukayamo nabumo, nakimo mu bweene napanandi. Ugwe gwaalyegile, ega ililopa lya kinyamana kangi biika mwa ugwe, ugwe kufwaga. Popaapo umwe muketile, uswe ubweene bo—ubweene bo buumi ubukindane mu lilopa lya kinyamana ukukindana ubu buli mu lilopa kya buundu, panongwa yakuti ubuundu buli nu moyo. Ikinyamana kikaya nu moyo mma.

²² Kangi lilino, polelo, ililopa lyeene, pilikisya lilino, unkemo unkesefu, amakemo ga lilopa, lyafimbilisigwaga ukwiima pa

kifigo, ukuya kikole ukuti u kang'osi aafwiile, lilino, panongwa yakuti u buumi bwa kang'osi bukaabagiile ukugomokela pa mwipuuti gwa buundu. Loli umwisyugu...Ikyene kyaali kyakwimilila itolo.

²³ Umwiisyugu ugweene gukaya nkemo gwa Lilopa lya Ntwa Yeso, u Kang'osi gwiitu, looli ikyeene kyaali Buumi ubu bwaali mu Lilopa, uyu yo Mbepo Mwikemo. Ubweene bukugomokela kangi bo Kikole iki uswe twitikiisye nukuboomba katikati iki Kyaala aatubuulile uswe ukuboomba. Kangi polelo, pakuti tuli ni Kikole, uswe tukulinganisigwa ni Likemo lyiitu. Nubupelelesye. Une ndikukeeta muumo kalikosa kabagiile ukuya pabwelupo. Muketile?

²⁴ Injila yeene aligwesa aabagiile ukukiindanisya ukuti inyumba yila yaali, yope, paasi pa lilopa, panongwa unkemo gwa lilopa gwaali pa kifigo. Abeene baakindile mula, u Gwaandumi aafimbilisigwaga ukukeeta nukulibona ililopa. Lilino, kangi, ikyene kyaali kyakwimilila Mbepo Mwikemo.

²⁵ Lilino, muketile, i Lilopa ilyanaloli lya Yeso likaabagiile ukwisa pa aligwesa gwa uswe mma, panongwa Umweene itolo aali ni Lilopa ikingi bo ulu mu Mbili Gwaake. Kangi ilyeene litondile, ukufuma mu mbili Gwaake, ukubuka mu mfu, ifyiija maelifu mabili ifi fikindile; looli ilyeene likaali ukuya Kikole. U Buumi, u Buumi ubu bwaali mu Lilopa, bwaali Kikole lilino. Une ngusisimikisyaga ikyeene kwa umwe, itolo mu miniti, ukwisila mu li Baangeli. Ikyeene kyo Kikole iki kibagile ukwiisa pa aligwesa gwa uswe, ukubonesya ukuti uswe tulinganisiigwe ni Likemo lyiitu, kangi tuboombile ukuloonda kwa Yehova.

²⁶ Peteri alinkuti, pa Lisiku lya Pentekosti, "Pinduka, aligwesa gwa umwe, kangi osigwa mu Ngamu ya Yeso Kristi kubusyuuligwe bwa butulwanongwa, kangu umwe mwisakwambililaga ikikungilwa kya Mbepo Mwikemo. Kabuno ulufingo lo luli kwa umwe, kangi ku baana biinu, kangi ku bala baabo bali kubutali, nu bwiingi ubu u Ntwa u Kyaala gwiitu isakukoolela." Muketile, komma unkunaangisya ikyeene itolo ku beene. "Na bu bwiingi bwa u Ntwa isakukoolela."

²⁷ Balipo biingi bikwiinogona abeene bakooleligwe. Looli boosa "u Ntwa" ikukoolela! "Abeene aba Umweene aamanyilengaani, Umweene aakooliile; bosa aba Umweene aakooliile, Umweene aabiitikisye; boosa aba Umweene aalitikisye, Umweene abimiike," kitalile ikindu kimasigwe.

²⁸ Kangi polelo akabalilo kaako ugwe kwegwa u muundu uyu atikwiitika ukuti u Mbepo Mwikemo yo gwaalisiku ili, keta iki abeene bikuboomba? Abeene bikukaana i Kikole iki kyo kimanyilo ikya ugwe ukuya ndunganisigwe ni Likemo lyaako. Muketile iki une ngasanusya? Ikyeene kyo kipepe fiyo linga itolo ugwe kuketa ku kyeene mu—mu njila iyi Kyaala aasiimbile ikyeene mosa lilino. I Lilopa lyatupiimbile uswe kangi uswe

twaali...likunaangisya i—i kimanyilo kya Mbepo Mwikemo, uyu yo Buumi.

²⁹ Lilino, ubuumi bwa kinyamana bukaabagiile ukugomokela mu buundu, panongwa yakuti ifyeene fikabaagiile ukufwanikisania, ubumi bwa kinyamana bukaya nu moyo mu bweene. Ubumi bwa buundu buli nu moyo. Ikinyamana akamanya ukuti umweene ali ngelebune. Umweene akamanya ikitalusye ukufuma ku kisobi. Umwene, umwene itolo... Umwene alinayo—u mbepo, loli komma umoyo. Lilino kumbukilaga, lilino, u moyo yo kipeligwa kya mbepo, tumenye.

³⁰ Lilino kêtésya, loli polelo akabalilo kako u Būmi lya Likemo lyĩtu, Yeso Kristi, akabalilo kako Ililopa Lyake lyalyoniike... Umwēne āli Kyāla, afwikiligwe mu Nnyāmbāla. Lilino, Umwēne āsulwike pāsi ukufuma ukuya Yehova, ukubuka kukwilingānia Mwēne ukuya mūndu, ukwēga pa Mwēne ububūmbe bwa nnyāmbāla, ukutulīngānia uswe nu Mwene. Umwene aali Kang’osi gwa Kyala. Kangi nkati mwa Umwene, kuko i Lilopa... .

³¹ Lilino une mmenye umunduyumo ikuyoba, “Umwene aali lilopa lya kiYuda.” Ugwe kupilika abaYuda bikuyoba ikyo. Umwēne akāli lilopa lya kiYuda, kangi kópe akāli lilopa lya Gwapanja. Umwēne āli Lilopa lya Kyāla. Umwēne akāli ni lya kiYuda... Umwēne akāli nJuda pamo Gwapanja. Umwēne āli Kyāla. “U—u—u mfunde isakuyaga ni kifuba.”

³² Lilino, une mmenye mwe bingi umwe bāndu kangi baProtestanti mukwinogona ukuti ilifumbi lila lyāli lya Maria. Kangi u—u bukesefu bwa lilopa ubu bukwīsa, ubūmi bukwīsa mu kambakāsya ka lilopa. Panongwa yakuti, i nguku yibagile ukunia ilifumbi, kisita kuyi ni njuni yakinyāmbāla, iyēne yitisakupānja mma, panongwa yakuti iyēne yikaya yamboto mma. Ubūmi bukwīsa ukufuma ku lusōko lwa lilopa, iki kyo kwīsa ukufuma ku bunyāmbāla. Lōli linga bukayapo ubunyāmbāla, popāpo, “ubūmi mu lilopa,” ikyēne kyafimbilisigwaga ukwīsa ukufuma kwa Kyāla mwēne, kangi Umwēne āpelīle imbakasya ya Lilopa mmūnda mwa Maria. Kyāla Mwēne, u Mpeli Mwēne, alinkupela imbakasya ya Lilopa. Lilino kēta. Abēne bikuyoba, “Mulimosa, ugwēne gwāli mbili. Maria āli ni lifumbi.” Umma, nkulumba. Umwēne akāli nalyo; kisita lifūmbi. Linga ilyēne lyāli lifūmbi, ugwe ukabagila ukuya nu lūta kisita kupalamasya. Kangi linga Umwēne, umwēne unkīkūlu āli nu kupalamasīgwa, ngimba ugwe kumpela Kyāla ikubōmba fiki?

³³ Umwene alinkupela fyosa ilifumbi ni Lilopa. Ikyo kyo katikati iki Umwene aali. “Uswe twālimpalamasisye Kyāla,” i Bāngēli lyāyobīle. Timoti Gwakwānda 3:16, “Kisitaka kukanikana bukulumba bo bwakubutītu bwa bwakyāla: Kyāla abonekīle mu mbili. Uswe twalīnkōlīle Umwēne na maboko

gĩtu.” Umbili gũla gwãli Kyãla. Naloliloli, ugwẽne gwãli. Umwẽne ãli Kyãla mōsa lōsa, mbubũmbe bwa bũndu bwa mũndu.

³⁴ Lilino uswe tukukētēsya mu iki, ukuti imbakasya ya Lilopa yila ukuya yabongotwike, yila yilinkusōsya Kyãla. “Kyãla ãli mwa Kristi, ukusayana ni kĩsu ku Mwẽne.” Kũko, nayumo uyungi ābagile ukubōmba ikyẽne, nakimo ikĩngi kyābagile ukubōmbigwa; ikyẽne kyālyēgile i Lilopa ilikemo lila, Mwẽne. Kyala alinkufimbilisigwa ukwisa pasi nukuya mundu, ukukubilwa ululagilo Lwãke Mwẽne. Linga Yeso ãli itolo nsololi, u nnyāmbala uyu āpaguligwe ukufuma kwa Kyãli, poleli Kyãla yo nsitabugolofu.

³⁵ Linga une nābagile ukuyoba, “Unko u NKundwe Grant afwe panongwa ya butulwanongwa bumo ubu Billy ābagile ukufwila,” pamo ikindukimo ikingi, ulufũdo lumu, ikyo kikuyaga busitabugolofu. Linga une nafimbilisigwaga ukumbika undumiana gwāngu kukugogigwa panongwa ya lufũdo lumu ulu une nāfumwĩsye, ikyẽne pōpe kikaya kyabugolofu mma. Bulipo ubugolofu bumobwẽne une mbagile ukubōmba, ko kwēga ubuyo bwãke, linga une ngulonda ukumpoka umwẽne.

³⁶ Kyala alinkwifimbilisisya ukuya mbili, ukwēga ubuyo bwa ntulwanongwa. Kyala ābonekile mu mbili, nakimo ikininipo ukukĩnda Kyãla Mwẽne. Lilino, apa Umwẽne ãli, abonekile mu mbili, ukusōsyāpo imbibi sya kĩsu. Kangi Umwẽne alinkwilingānia Mwẽne mwa uswe, ukuti uswe tubagile ukwilingānia mu Mwẽne. Muketile inongwa ya ikyẽne?

³⁷ Lilino uswe tukwāgania kulingania kwĩtu ni Likemo lyĩtu, Ubumi bwa Likemo mwa uswe, uyu yo Mbepo Mwikemo. Akabalilo kãko imbakasya ya lilopa yalyōnĩke, iyẽne yilinkwābulila Kyãla, yilinkwābulila Kyãla, ukuti Umwẽne ākemēsĩsye abāndu bamo ni Lilopa Lyãke Mwẽne kangi ukumbika Kyãla mu mũndu kãngi. Kyã mwa ugwe, Bũmi Bwasyēpwa!

³⁸ Kangi umfundigwa aligwesa gwa kiGriki amēnye ukuti ilisyu lila, Bũmi Bwasyēpwa, likufumila ku lisyu Z-o-e, *Zoe*, ili kokuti “Bũmi bwa Kyãla Mwẽne.” Uko ko kotalusya. Injila yene iyi ugwe ubagile ukuya nu Bumi, lulipo uluko lumolweene ulwa Bumi bwa Bwilanabwila, kangi ubo bo Bũmi bwa Kyãla Mwẽne. Muketile? Polelo ugwe uli nu Bumi Bwa Bwilanabwila, panongwa yakuti Umwene yo Bwilanabwila mwẽne uyu aliko. Kangi uswe twe fyakubagilila fya minogono Gãke, bo kukãli nukuyako ulwãlo lwa kĩsu pamo kalikosa. Fyōsa ifi fyo itolo kwĩnogona Kwãke, kangi uswe twi kibonekelo kya minogono Gãke isya iki ikyẽne kyãli.

³⁹ Kangi Umwẽne afimbilisigwaga ukusuluka pãsi ukusōsyāpo ubutulwanongwa. Nayumo uyungi ābagile ukubōmba ikyẽne.

Akālipo nayumo áfwēne ukubōmba ikyēne. Nayumo ábagile ukubōmba ikyēne lōli Mwēne, kangi Umwēne ábōmbíle ikyēne.

⁴⁰ Kangi polelo, akabalilo káko ubūmi bula bwalyábuligwe ukufuma mu mbili gula, Nnyāmbala, uyu yo āli Mwanundumiana gwa Kyāla (Gáke amaka agakupela galinkumpela ikiyūmba, ngati unjengi aligwesa, áyēngile iliyumba iyi Umwēne ášāmilémo, Mwēne, Kyāla ábōmbíle ikyo.), kangi polelo, akabalilo kako ubumi ubu bwaalyégigwe, i Lilopa, unkemu gwa ilyene, gulinkonekela pamwanya pa mfu, itolo bo *ngati* Abeló ályōníle pamwanya pa mfu, loli ukufuma ku Lilopa kulinkwisa Mbepo Mwikemo gwa Kyāla, kangi Yula átumigwe ku mūndu Pisiku lya Pentekosti, ukulinganisigwa ni Likemo ili lyābafwilíle abēne. Yikayapo injila iyingi mma nkísu uswe tubagile ukukupilikisya ikyēne. I Kikóle ikipalamasigwe!

⁴¹ Kēta, linga ugwe gwālintobesigwe ku bufwe, kangi ugwe gwāmenye ugwe gwābukaga ku kikota kya magesi, kangi kumbukila, ukupíka . . .

⁴² Dallas, pilikisya! Ukupíka i Lilopa lya Yeso Kristi, i Kikóle kya Lilopa Lyāke, linga umwe muketile Ilyēne kangi mukulikana Ilyene, umwe mukwaganaga nu Bulongi ni Lilopa Lyāke mmaboko gīnu. Ntulwanongwa, gwakipanga, kimbukilaga ikyo.

⁴³ Bule linga Lee Oswald aabagiile ukuya, amasiku manandi gala, kangi kula ukusooka amafuke pankyeeni pa Bulongelo Bwapamwanya ubu umwēne afimbilisigwaga ukwāgana; kangi āmēnye, ukufuma kukugoga u Presidenti, kula kukayā ngako nakapatu kamokene aka kisa, mūmu u nnyāmbála yula abāgile ukuti ālipilike! Ikyēne kyabagisenie ukuya kindu ikitilisya. Umwēne akalyagenemo siku ni kyēne, panongwa yakuti umwinitu uyungi alíntusulíle. Lōli inogono isya kwitugāsya pala pankyēni ba Balongi Baowanya abakalale, ni lilopa lya muundu mwiinaako pa kiboko kyaako, u Presidenti gwa United States! Ikyo kisakuyaga kindu kipepeko, kwa umwe baandu mwe mukukilania i Lilopa lya Yeso Kristi, akabalilo kaako umwe mwisakwiima mbulongelo bwa Kyaala. Yaga na mafuke akabalilo kaako umwe mumenye. Oswald aabagiile ukubomba nakimo ikyakukiinda ukusookamo mbumi ubu panongwa ya mweene, looli Kyaala ikukusoosyamo ugwe Kwasyepwa ukufuma mu Kuyapo Kwaake. Ikyeene kisakuya kiindu ikitilisya. Keetesya.

⁴⁴ Linga ugwe gwaaliisile ku bulongelo, ukuya ntobesigwe, ugwe angali uloondile ummanyandagilo unkindibosa ugwe gwaabagiile ukwaaga. Aligwesa aabagiile ukubomba ikyeene.

⁴⁵ Kangi umuundu aligwesa uyu apaapiigwe nkiisu, une ndikupaasya ko kaaya kanunu kaki umweene afumileko, umweene atobesiigwe panongwa ya Lilopa lya Yeso Kristi mpaka umweene itikiisye ukuswa kwa ilyeene. Kangi injila yeene iyi ugwe kumanye uluhobokelo lo litalusye, akabalilo

kaako i Kikole kikwiibiika Kyeene pa ugwe, kangi ugwe ulinakyo i Kikole.

⁴⁶ Keetesya, ugwe ulintobesigwe, kangi ugwe ubagiile ukufwiima ummanyandagilo unkindabosa uyu ugwe ubagiile ukumwaaga ukulaamba inongwa yaako. Kangi linga une nabukaga ku Bulongi bwa Kyala, une ndikulonda umputi nayumo, une ndikulonda u nnyambala nayumo mma; une nguloonda ummanyandagilo unkindebosa une mbagiile ukumwaaga ukulaamba inongwa yaangu.

⁴⁷ Unko une njobe iki, kwa ugwe, mwinangu Nkristi mwinangu. Ummanyandagilo gwiitu yo yoope ndongi gwiitu, kangi ugwiitu—igwiitu undongi alinkuya mmanyandagilo gwiitu. Inongwa yihoombigwe akabalilo kaako uswe tukwambilila uluhobokelo Lwaake. U ndongi Mweene alinkusuluka paasi nukuya mmanyandagilo, kangi u mmanyandagilo nu ndongi yo Mundu yumoyweene yulayula. Kyaala alinkuya muundu, ukuti Umweene aabagiile ukwitikisya u muundu ukwisila mu fewwe Bwaake Mweene ubu Umweene aabiikile pa mweene. Haleluya! Uko kokuti, “Ntufye u Kyaala gwiitu!” Umweene afweene ulutufyo loosa. Undongi gwiitu kangi ummanyandagilo gwiitu yo Muundu yumo yulayula.

⁴⁸ U Mbepo Mwikemo yo Kikole ukuti uswe tuhobokeligwe. Inongwa yigaligwe. Ku nnyambala nu nkiikulu aligwesa uyu naloliloli aambiliile uloosyo lwa Mbepo Mwikemo, umweene ageliigwe, umweene alinganisigwe nu mmanyandagilo gwaake, nu ndongi gwaake, ni likemo lyaake, kangi i Kikole umweene ikukolelela mbwenenakyo bwaake kikunaangisya ukuti ubweendelo bwaake buhoombiigwe ku Lwiimiko. Ameni. Iyeene yimalike loosa. Umweene ikikukolelela i Kikole kila. Ikyeene kyo kyaake, ulosyo lwa Mbepo Mwikemo, uyu yo buketi bwa busyuke bwa Yeso. Ameni. Ngimba umwe mukwitika ikylene? [Ikilundilo kikuyoba, “Ameni.”—Nsimbi.] Ubo bo bulinganisyo bwako, ugwe kukolelela i Kikole.

⁴⁹ Lilino linga ugwe ukaya nakyo i Kikole kila, ugwe utisakwingilaga mma. Ugwe kufimbilisigwa ukuya ni Kikole. Ugo go ntengo ugu gukuloondigwa, “Akabalilo kaako Une nguketa ililopa, ililopa lyo kikole. Akabalilo kaako Une nguketa ililopa, Une nisakukilaniaga pa umwe.” Ugwe kufimbilisigwa ukuya ni Kikole. Linga ugwe utikuboomba, ugwe utisakubuuka mma. Ugwe kufimbilisigwa ukuya nakyo i Kikole.

⁵⁰ Linga ikikole kikanaangisigwe, ikikole kikabonesigwe paasi pala, loope nulwiitikano lukaali lubombambombo mma. Ugwe kuyoba, “Ena, lilino, Nkundwe Branham, lilino gulila panandi itolo.” Ikyo kyo katikati kotalusya.

⁵¹ Ikikole kyaali pamwanyapo pa lwiitikano. Kabuno Israeli aali nu lwiitikano ukuya babuutigwe, kangi unJuda aligwesa akabagiile ukubuuka panja nukunaangisya umuundu aligwesa,

“Une mbagiile ukusisimikisya kwa umwe une mbuutiigwe, une ne nJuda, une mbuutiigwe ukufwana nu lulagilo lwa Yehova,” looli pope kila kikaalimmwaabwiile umweene linga ikikole kikaali pa kyoope. Umweene ikufimbilisigwa ukunaangisya ikikole. Ngimba umwe mukupilikisya ikylene? [Ikilundilo kikuyoba, “Ameni.”—Nsimbi.] Umwene...Ikikole kibagile ukuyapo, mulimosa. Kangi linga ugwe guli mu lwiitikano... Linga unJuda aligwesa aabagiile ukuyoba, “Une ndikubikapo nalimo ililopa pa kifigo kyaangu, une mbagiile ukusisimikisya ukuti une ne nJuda gwalwitikano,” u Gwaandumi gwa bufwe ammwagaga umweene. Kisita kupaasya muumo aayiilile nsubiligwa, kali aali gwakipanga fiyo umweene, kali fyo fyakalongo filinga ifi umweene aahombiile, bo bwingi buki umweene aayobiile umweene itikaga Yehova; Yehova aalondaga ikikole kila.

⁵² Kangi Umwene ikubomba ikylene umwisyugu, koope. Ikyene kibagile ukuya. Ikyene kikufimbilisigwa ukuya, “Kabuno yikayapo injila iyingi mma paasi pa ku Mwanya, komma ingamu iyingi, mu njila yiliyosa,” kali bo bununu nki, bo busubiligwa nki. Ikikole kila kikufimbilisigwa ukuyapo pala, kangi kinaangisigwe.

⁵³ “I lilopa,” ugwe kuyoba, “mulimosa, une naagogiile a kang’osi kangi une naabiikile mu ndeko. Une njibiikile iyeene kunyuma kula.” Ikyo kyo kikaya iki Umweene aayobiile. Ilyene likufimbilisigwa ukuya pamwanya pakifigo na pabuyo bwa kifigo. Ilyene likufimbilisigwa ukunaangisigwa.

⁵⁴ Kangi ubuumi bwaako bukufimbilisigwa ukunaangisya i Kikole kili mwa ugwe. O, umwe baPentekosti, ngimba kitamisye fiki na umwe? Inywili indumulano, ifisyo ifipakigwe ni laangi, nnyambala, isunga isyakinyanyasi ni findu, ngimba kuli kuugu ukunaangisya kula kwa Lilopa lya Ntwa gwaangu Yeso Kristi yo Kikole kya Mbepo Mwikemo? Umwe, ukuya nububonekelo bwa bunyakyala, nukukoolela “bulosi” na filifyosa ifingi, imbombo sya Kyaala, “bulosi.” Ngimba umwe mukunaangisyaaga bulebule ikikole?

⁵⁵ Abene bikuyoba, “Une ne gwa kiPente- . . .” Une ndikupasya iki ugwe guli. “Une ne gwa kiBaptisti. Une ne gwa kiPres- . . .” Une ndikupaasya iki ugwe guli. I Kikole kila kikufimbilisigwa ukuyapo pala. Kyaala ikuloonda Ikyeene, kangi nakimo ikingi looli kila.

⁵⁶ Ugwe kuyoba, “Mulimosa, une ndinalyo ikya budokotala.” Une ndikupaasya go madigiri malinga ugwe guli nago. Kyaala ikuloondeesya i Kikole, kangi Kila kyeene. Ikyeene kyo kimanyilo ukuti injila yaako yihoombiigwe. Umweene atisakweega ifyakubagilila fyaako pamo ikindukimo ikingi. Umwene ikufimbilisigwa ukweega kila i Kikole.

57 Umwendesya igali ukuyoba, “Apa, guulila I miniti, ikyo kikaya kikole kyaangu mma.”

58 Unnyambala gwa ndeeye ikuyoba, “Mulimosa, ugwe sooka panja pala lilino.” Itikiti lyo kikole. Ugwe sooka panja pala nukumbula umwendesya ndeeye, “Apa, une nguloonda ukwitoga pa ndeeye yaako. Ngimba silinga iyeene?”

“Buuka nkati nukwakweega ikikole kyaako.”

“O, une ngwakuhoombaga.”

59 “Une ngabagila ukwega ikylene. Ugwe utisakwitoga pa ndeeye yaangu mpaka ugwe kubuuka ukwakuhoomba untengo nukwakweega ikikole. Une nguloondesya ikikole kila.”

Ugwe kuyoba, “Ena, une mbukile ku sukulu. Une naabombile *iki*. Une . . .”

60 Une ndikupaasya iki ugwe uboombile, ugwe kufimbilisigwa ukuya ni Kikole kisita iki ugwe utikufyukamo mma. Ameni na ameni. Ngimba umwe mutikukibona iki? Kyaala ikuloondesya i Kikole kila. “Akabalilo kâko Une ngukêta ililopa, kangî pene pala nisa Une ukukilania pamwanya pa ugwe akabalilo kâko Une ngukêta ikikole.”

61 Ikyeene kikabonesigwe mma, u lwiitikano lukaali nambubombombombo mma. U nJuda aabagiile naloliloli ukuyoba nukwisimisikisya mweene ukuya—ukuya mbuutigwe nJuda, umweene aabagiile ukubatwaala abakundwe panja nukuti, “Keeta apa, une mbuutiigwe.” Kila kikasanwisye na kandu kamokene mma.

62 Ugwe kuyoba, “Une ndi gwa Methodisti. Une ndi gwa Baptisti. Une ndi gwa Pentekosti. Une ne *iki*. Une ne *kila*.” Ikyo kitikusanusya nakimo na kimokyeene mma.

63 Ugwe kufimbilisigwa ukuya ni Kikóle. Kangi akabalilo kâko i Kikóle kikwîsa, Ikyêne kikuyoba isya Kristi. Umwêne âyobîle Ikyêne kisakuyobaga. Kangi Kristi yo Lisyu. Kangi ngimba ugwe ubagîle bulebule ukupîka ukuti i Bângéli lya lyâbwanaloli, ikiyabo kya Ilyêne, kangî pôpe nukuyoba ugwe uli ni Kikóle, akabalilo kako i Kikole kyo bukete bwa Yeso Kristi? Muketile, yo nongwa yake une nguswiga.

64 “O,” kuti, “Une ndikwitika, une ngwitika mmasiku ga fîka . . .” O, keta kula, kikayapo i Kikole pala. I Kikóle kikung’wala ulufingo lulilosa na “ameni,” kilikyôsa, ’nongwa yakuti ikyêne yo Kyâla Mwêne. Muketile? Umma ndaga.

65 Lôli linga i kikóle kikâlipo pala, ulwítikano lukâli nkabômbô mma. Ulwêne lwâsyumulîgwe. Mo mulamula lilino! Kali bulebule—kali bulebule ugwe kuyoba, mumo ugwe kulondela ukuyobela, “Une ngwitika i Lisyu lyosa muli Bângéli,” mukuyoba, “Nkundwe Branham, une—une mbagîle ukwandisya kwa ugwe sinda gwa i Bângéli lila, i Bângéli lyôsa, pa ndumbula.

Une ngwitika akayabo kalikosa ka Ilyeene.” Ikyo kyo kinunu. Setano ikubomba, yope. A-ha. Ukwene kikwégéla i Kikóle!

⁶⁶ “Mulimōsa, Nkundwe Branham, une ndinakyo ikibũmba kyāngu kiswile na ma digiri. Une ne gwa Bachelor gwa i Fyakwatakwata, kang'i une ndinayo i digiri ya dokotala, ni LLD. ya kiLatini. Kang'i, o, une nsĩmbĩle aba bũku. Une mbõmbĩle iki. Une mbõmbĩle kilikyõsa. Une—une mbõmbĩle fyõsa ifindu ifi.” Une ndikupasya. Ikyo kyo kyosa kyõsa kinunu, loli põpe ugwe kufimbilisigwa ukuya ni Kikole. I Kikole, põpe i Kikole kikulõndigwa!

⁶⁷ Umwe mukuyoba, “Une ne mfundigwa gwa i Bāngéli aligwesa umwana. Une—une ndi mundu unununu. Une ndi *iki, ikyo.*” Ikyo kibagile ukuya kinunu, ikyo kyo kinunu lõsa, loli põpe ikylene kikufimbilisigwa ukuya nakyo i Kikole!

⁶⁸ Lilino, ubufwe bwalitēdekĩsyē ukutika Igupti pa kabalilo kalikosa, kang'i momumu ubufwe bwitēdekĩsyē ukutika ikĩsu lilino pa kabalilo kalikõsa.

⁶⁹ Anna Jeanne, une ngwipilika ikindukimo bo yu gũso, āyobĩle ubuyobelo bumo akabalilo kamo. Une akabalilo kõsa nkiganile kila. Umwene alinkuti, “Umwe mumenye, ikisu iki, ni mbibi silasila, linga Kyala ikwitikisya Amerika ukubũka itolo na ifi umwene ikubomba, Umwene pa bugolofu bwake isakufimbilisigwaga ukunsumusya Sodomu na Gomora kang'i nukwilamba ku bene, panongwa yakubokya abene.” Kang'i isyo syo kotalusya.

⁷⁰ Kumbukilaga, Israeli āhombilie panongwa ya butulwanongwa bulibosa umwēne abõmbile, kang'i nanuswe twisakuhomba. Bo bupepe buki uswe twisile ukuya? Pinya nubufwenye ikyabwite kyāko! Gomokelaga kwa Kyāla, kipanga! Ndikuyoba ifindu ifi ukuya nkĩdane. Une ngubabũla umwe ukuya kusoka. Umwe itika!

⁷¹ Ubufwe bwalitēdekĩsyē ukutika. Kyāla ābanāngisye abēne ilipyana Lyāke kang'i ikisa Kyāke, ukwisila mmaka ni fimanyilo ni fiswĩgo (mo mũmo abõmbile Umwēne umwĩsyugu bo akāli ukwēga i Kipanga panja), põpe bēne balinkusita kulonda ukupĩnduka nukwitika indumi.

⁷² Muketile, yālipo indumi itolo pankyeni pa kwegela panja i kipanga. Pala pikifimbilisigwa ukuya. Lulalula lilino. Kilikyosa ikyamwambepo iki kikuboneka kyo kimanyilo ukufuma kwa Kyala. Ngimba umwe mukwitika sisisi? [Ikilundilo kikuyoba, “Ameni.”—Nsimbili.] Bo yi Ndumi, pala kilipo ikimanyilo kang'i polelo i Ndumi yikukõnga ikimanyilo. Kyala alimbulile Mose, aatile, “Linga abene batisa kwitika ilisyu lya kimanyilo ikyakwanda, lumo abene bisakusubilaga ilisyu lya kimanyilo kya bubili.”

⁷³ Lilino, akabalilo kākõ umwe mukukēta ifimanyilo fikubõmbigwa, kang'i indumi nayimo kunyuma ku kyēne, itolo i

sukulu yaiyolo yilayila iya bufundakyaala mpaka pāsi, yula akāli Kyāla mma. Lōli kūko kilipo ikimanyilo kibonesigwe, i Ndumi yikukongésya icyēne. Lilino keta. Yeso ikwisa pa buyo. . .

⁷⁴ Ngimba une ngubapamapuli umwe? Pamo kali ywāne ali pa kyakuyobelapo iki apa, kikupilikigwa ngati icyēne kikufumila ku nyuma. Lumo icyēne kikuywēga panini. Une ngulōnda umwe ukupilikisya icyēne.

⁷⁵ Akabalilo kāko Yeso ālisile pa buyo, Umwēne akāyobīle fingi fiyo ku bāndu, aligwesa āmulōndaga Umwēne nkipanga kyāke. “O, u Nsololi unkeke uyu, uswe tuli itolo bahobofu fiyo ukuya nayo Umwēne.” Umwene ābumbulusyaga ababine. “O, lwimiko kwa Kyāla. Kyāla afyusisye u Nnyāmbala unkulumba pakati pa uswe.” Kila kyāli kinunu. Popāpo ilisiku limo icyēne kilinkufika pa buyo kūko. . . Kila kyāli kimanyilo Kyāke.

⁷⁶ Yesay 35 āyobīle icyēne kyābagīle ukuya kimanyilo. “Abalemale bānyelanyelaga ngati mbabala,” na fyosa bo ifyo, “abafwamaso bānyelaga ukukēta.” Ikyēne kyāli kimanyilo.

⁷⁷ Umwene ābonesyaga ikimanyilo Kyāke ukuya Mesiya, na fyosa bo ifyo. Kangi abene, bingi ba abene, balinkuti, “Ena, une mbagile ukubuka ku ikyo.” Mulimosa, lilino, linga kila kyāli kimanyilo, pala pikufimbilisigwa ukuyapo ilisyu lya kimanyilo. Ngimba lyāli fiki ilisyu kunyuma ku kyēne? Akabalilo kāko Umwēne ālyāndīle ukumanyisya ikimanyisyo Kyāke nukubakōlēla abēne i kibugutila kya miyoka ndīsu. Umwēne akāli nganigwa ukufuma pala, muketile, akabalilo kāko ilisyu lyālīsile ni kimanyilo. Ikimanyilo kyābūkīle tāsi.

⁷⁸ Mōse ābūkīle kula mu Igupti ni kimanyilo kimo. Kangi umwēne alinkusopa pāsi ingili yāke, yilinkwānduka ukuya njoka. Ikyo kyaali kimanyilo. Loli ukukīndāpo akabalilo, ilisyu likwisa ni kimanyilo. Polelo ikyene kyāli kikīndāne. Muketile, abēne batikulōnda ikyo. I—i lisyu, likufimbilisigwa ukuya, ukukōnga ikimanyilo. Kangi pa kabalilo nakamo icyēne kyābagīle ukuyamo siku ukuti kyālīsile lōli akabalilo kāla, panongwa yakuti akēne kāli kabalilo ukuti a Masīmo gafwanikisigwe. Kēta iki Umwēne ālimbūlīle umwēne, mu lusīngi ulupye lula, “Une ngētīle ingoloma kangi mbilike ifyēne ifya bāndu Bāngu, kangi ngētīle ukukubilwa kwābo panongwa ya balagili-pambombo ba Igupti, kangi Une ngukumbuka ulufingo Lwāngu ulu une nātēndīke na Abraham.” Ifyīnja bamia bana fyākindile, kangi Umwēne ālimbūlīle Abrahama abēne bikuyaga pāsi kula. Muketile, akabalilo nakamo icyēne kyābagīle ukuya. Mōse ābagīle ukwisa itolo akabalilo kala.

⁷⁹ Ikoloko ya Kyāla inywāmu yikutika nubupelesye. Iyēne yitikuyaga iminiti yimoyēne nyēngo pamo iminiti yimoyēne ngābīle. Iyēne yisakuyaga itolo katikati pamwanya pa kabalilo. Mulimosa, popāpo, umwe muketile, kilikyosa kyendaga itolo nubutalusye, kikābagīle ukwisa pa tubalulo utūngi.

⁸⁰ Fyope ifindu ifi fikābagīle ukwisa pa tubaloli utūngi. Iki kikābagīle ukwisa mmasiku ga Luteri. Ikyēne kikābagīle ukwisa mmasiku ga Wesley. Amasiku ga baBaptisti pamo baMethodisti, mmasiku gābo, ikyēne kikābagīle ukwisa. Ikyēne kikufimbilisigwa ukwisa lilino. Israeli ikufimbilisigwa ukuya kikolo. Ifipānga fikufimbilisigwa ukuya mūmo ifyēne fiyīlīle lilino. Pala pafimbilisigwaga ukuyapo indumi yakitatu, ingulilo ya kipānga yakitatu. Pala palinkufimbilisigwa ukuyapo Laodikiya. Ikyēne kikābagīle ukwībumba mpaka Pentekosti isile kangī balinkumalisya ifyābo fyōsa nukusōka nukupāngania, nukubōmba iki abēne bābōmbīle. Polelo ikyene kikufimbilisigwa ukwisa, polelo ikiwisa u Ntwa, akabalilo kako abēne balinkumbīka Umwene panja pa kipānga. Umwene yo Lisyu.

⁸¹ Abēne bikutīla ukukanika i Lisyu paliposa. Abēne bikuya bākimyemye fiyo isya Ilyēne, lōli abēne bikuya namatingo ukufwana ni kyēne.

⁸² Chicago, apa pakaya patali mma, akabalilo kāko u Ntwa ālimbēle imboniboni. Une nāli na balumbilili bamia batatu kula kula. Une ndinkuyoba, “Lilino une mmenye iki umwe. . .” ukufwana ni mbeyu ya liyoka, na fyosa bo ifyo, Une ndinkutoba, “yumo mwa umwe ega i Bāngēli lyīnu kangī isaga ima pa lubafu lwāngu nukukanikana ni kyēne.” Ikibugutīla ikyakimyemye ugwe upilikemo siku. Une ndinkuyoba, “Polelo sōkāpo pa nyuma yāngu.” Muketile, ikyēne kifumile ku sukulu yābo iyakwinogonela.

⁸³ Pōpe, abene bikuyoba, “Nkundwe Branham yo nsololi akabalilo kāko umwene apakīgwe, loli akabalilo kāko ubupake busōkilepo pa mwene, o, une ngamanya.” Kyo kiki i . . . Līnga ikyo kikaya bupime bwa u—u—u—u mfundakyala unfuluganike-mōsa! Kilakila. . .

⁸⁴ I lisyu *nsololi* kokuti “unsetuli Gwamwakyala gwa Lisyu.” I Lisyu lya Ntwa likwisa ku basololi. Iyo yo njila iyi Yeso ālinganisīgwe. Kangī abene balinkuyoba ukufuma pa busyūke, abene balinkuti, “Uswe tumenye Umwene ali nsololi ukufuma kwa Kyala,” muketile, “nayumo umundu ābāgīle ukubomba ifindu ifi pene papo Kyala ayege na yumwene,” polelo tutikwitikisya i Ndumi yake. Abene balinkutoligwa ukummwitikisya Yohani, kangī umwene aali nsololi. Balinkutoligwa ukummwitika Eliya, nayumo mwa bosa ba bēne, kangī abēne bāli nu busetuli Bwamwakyala.

⁸⁵ I lisyu, i lisyu lya kiNgereza, *nsololi*, amasyu ga kiNgereza gabagīle ukusanusya kalikosa, ilyēne kokuti “u ndumbilili.” Lōli akabalilo kāko ugwe kuyoba *nsololi*, ugwe i Bāngeli ilikūlu, ilyēne lyasanusyaga “u nketi.” Kangī ifyakumbagilila fyāke fyāli, ukuti, iki umwēne āyobīle kyābonekaga, kangī kila kyāli kimanyilo ukuti umwēne āli nsololi; umwēne yōpe kila kyāli

kimanyilo ukuti umwēne āli nabo ubusetuli Bwamwankyala ubwa Lisyu ilisimbígwe. Kangi polelo Kyāla ikusisimikisya ikyēne, kunyuma kwa umwēne, ukusisimikisya ikyēne.

⁸⁶ Bulebule? Mulimosa, ikyēne kikufimbilisigwa ukuya njila yila, ikyo kyo kyōsa. Yikayapo injila yimo mma ukusyungutila pa kyēne. Kyāla āyobīle ikyēne kikuyaga injila yila, kangi mwakēta lelo umwe. Lōli pala kilipo ikyēne umwīsyūgu, muketile, i Kikōle kila kikufimbilisigwa ukuyapo pala, iki kikulīngānia i Lisyu lila kangi kikupela ikyēne katikati kyabwanaloli. Polelo mūmo Umwēne āfīngīle, mūmo Umwēne ātēndekīsyē bōsa ba bāndu ba kīsu-kifīngīgwe Bāke, lilino, akabalilo kāko Umwēne ātaga pakuya nu kusōka uku, iki kyāli kyākūwīmilila.

⁸⁷ Lilino une ngugelaga ukusōka mu maminiti kalongo na mahano, malongo mabili, ni Ndumi. Kētēsya kifuki lilino, une ngulonda umwe ukukupilikisya iki, 'nongwa yakuti une lumo ndisakubabonamo umwe siku kāngi, muketile.

Kētēsya, lilino kētēsya mūmo Umwēne ātēndekīsyē abāndu Bāke.

⁸⁸ Balinga bamenye ukuti Umwene atikwandukamo injila Syāke? Umwene atikubombamo siku. [Ikilundilo kikuyoba, "Āmeni."—Nsimbi.] Umwene yo...lilino keta ukwisila mu i Bāngéli kangi keta linga Umwene alyāndwilēmo siku. Umma, nkulumba.

⁸⁹ Ngimba Umwene ātēndekīsyē bulebule abandu? Ikyakwanda, Umwene ātumīle unsololi ni kimanyilo, uyu āli Mōse. Ngimba isi syabwanaloli? [Ikilundilo kikuyoba, "Āmeni."—Nsimbi.] Kangi i kimanyilo kyāli ni ndumi, i ndumi "ukuya gwakwitendekesya," abēne bāsokaga ukwega i kīsu iki kyāfīngīgwe. Polelo Umwēne āli nu bulinganio, ubwa nsololi uyu, ukuti u Lumuli lwāli pamwanya pa umwēne. I Mbanda ya Moto yānkongaga u nsololi uyu, uswe tumenye ikyo, ukubūka ukukīnda ndulangalanga na Mōse. Uswe tukukyagania ikyo. Kangi polelo Umwēne ābapēle abēne i kikole ukuya kisisimikisyo ukuti abēne bangayaga bākutīla mōsa ukulalamuka nukuya nulutēnde; kūko Umwēne āyobīle, "Akabalilo kāko Une ngukibona ikikole, Une nisakukukilaniaga ugwē."

⁹⁰ Kētēsya mūmo Umwēne ābōmbīle lilino. Umwēne ātēndekīsyē tāsi ikimanyilo, untumigwa, indumi indinganisigwe, ukulinganisigwa kwa ntumigwa, ni kikole ukuya kisisimikisyo ukuti injila yāhōmbígwe. Abēne bikutalulila ku kīsu ikifīngīgwe.

⁹¹ Ikindu kilakila iki Umwene aabombile umwisyugu! Ngimba Umwene aabombile fiki? Umwene alinkutuma kwa uswe Mbepo Mwikemo. U Mbepo Mwikemo yo Ntumigwa, kangi u bulinganio Bwamasimbo bwa Mwēne bukundīngānia Umwēne pakati pa uswe, yulayula mmayolo, umwīsyūgu, na bwilanabwila. Kangi

i Kikole kyo kisisimikisyo. Ngimba uswe tukupasya na fiki? Untengo gwítu gutalile guhómbígwe kangi uswe tulinganisígwe ni Likemo lyítu. Umwène akabagíla ukukukána ugwe. Umwène áfíngíle ikyo. Uswe tulinganisígwe.

⁹² Israeli ikusóka ukufuma mu Igupti, bo mūmo une njóbíle, kuli ngati u—u Nsíngilígwa ikusóka panja pa kipānga. Akabalilo káko Mōse ikwānda ubutumigwe bwāke, Israeli gwēsa alinkubūngána palikimo mu Gosheni, ku lwípúto nu kwípútila, katikati, ukwisa ukufuma ku fiyabo fyōsa fya Igupti. Umo momūmo u Nsíngilígwa isakubōmbelága, isakwisa ikufuma ku fyōsa fya ba Oneness, Twoness, Threeness, kangi nu luko lōsa ulungi. Ikyēne kisakusóka. Ikyēne kikufimbilisígwa ukubōmba. Lilino uswe tukubala apa mu Bahiburi i. . . Uswe lilino, ikindu kyākwānda uswe tubagíle ukwīnogónela, ukwisa ukufuma mfiyabo fyosa, “Sóka panja ukufuma pakati ba kusitakwitika.” Lilino u Mbepo Mwikemo áfíngíle ukukóléla kila mmasiku gabumalikisyo, “Sóka panja ukufuma pakati pa basitakwitika.” Kētésya.

⁹³ Uswe tukusyāgania mu Bahiburi 10:26, une nsímbíle pāsi apa, ikyēne kikuyoba iki, “Linga uswe tukutulwa inongwa nubwígane ukufuma pāpo uswe twālyāmbilíle ubumanyi bwa Bwanaloli, likayapo kangi ilikemo panongwa ya butulwanongwa,” muketile, linga ugwe kusitakwitika nubwígane.

⁹⁴ Lilino linga umwe mwisakukētésya, kyo fiki une mbagile ukuyoba apa, linga umwe mwisakupaya akabalilo mpaka une nguténdéka ikibonesyo kila. Une mbagíle ukwípilika mwa Mbepo, ngāgomokilémo kanunu mma. Muketile? Kētésya.

⁹⁵ Apa yo Bahiburi, abēne bali pa nsebwe gwābo panja. Kyāla āsalíle abanyāmbala kalongo na babili, pamo Mōse ābōmbíle, ni kiboko kya Kyāla, ukubūka ukukilania nukwakuténdéla mōsa nkīsu; nukugomoka, ukutwāla ikikole kya kīsu. Kangi akabalilo káko abēne bāfikíle kula, kalongo ba abēne balinkutíla kufwe. “Fiki,” abene balinkuyoba, “bala abaMaleki kumwanya kula, uswe twabonekaga bo mapalalila ku bene.” Yoshua na Kalebu bikugomokela, bikutwāla ubukēti, “Uswe tubagíle ukubōmba ikyēne!”

⁹⁶ Umwe muketile, uyo yo mwitiki gwamumpaka. Abēne bālísíle ukukíndámo imbakasya ingindane isi, kangi ukukínda ikipānga, nu kwīngila kipanga, ni nyōsyo ni fibūmbe. Lōli akabalilo káko ikyēne kikwisa kulakula ku kuloboka kwísílya ukwakwēga i Kikole, ubukēti ukuti i Kīsu kiliko kula, Būmi bula. . . Yeso Kristi akafwa mma. Ubwēne bo bugelo ubūngi. Umwēne ikwitūgasya mu bwēne. Umwēne ali na uswe, Umwēne ali lilino mwa uswe. Akabalilo kako ikyene kikwisa ku ikyo, “aa,” abene balinkutoligwa ukwitika ikyo. Sila syali nywamu fiyo, umwe muketile. Kangi abēne bikugomokela, kangi

abène, aligwesa, áfwíle ndulangalanga, kisita na yumoywène alobwíke. Kangi, muketile, linga uswe tukusita kwitika, uswe baMethodisti, baBaptisti, baPresbeteri!

⁹⁷ Une ngusúbíla ummanyisi gwāngu ugwaiyolo itūgésye apa umwísyúgu. Dokotala Roy E. Davis, bingi ba umwe mumenye umwène, papapa apa ku Forth Worth, umwène lūmo itūgésye muno. Une ngukumbuka uswe twāyobesenie ifindu ifi, ifyinja fingi, fingi ifi fikíndílepo. Umwène ālinyōsisye une mu lwítiko, i kipānga kya Missionary Baptisti.

⁹⁸ Kangi kēte, muno, lilino, linga uswe. . .linga—linga uswe tukufika kula ku kisu kya mpaka, tukuyoba, “Mulimosa, lwimiko kwa Kyalá, une njobile mu ndimi, haleluya!” Ikyo kikaya kyo kyene. Linga ugwe ubagíle ukuyoba, ukusitakwítika liliyosa lya Lisyu lila, kilipo kimo kitamísyé nu bwisibile bwāko. Muketile?

⁹⁹ Ugwe kufika itolo kifuki ku Kísu nukukēta ikyēne kiliko kula. Ugwe kukēta ukuti Yeso ásyúkíle. Umwène ali pakati pa uswe. Ugwe kupilika i Lisyu ili likukōnga i ndumi, kangi pōpe ugwe utikwítika Ilyēne, ugwe umēnye iki kikuboneka? Polelo abene báfwile mu lulangalanga. “Linga uswe tukutulwanongwa nubwígāne ukufuma pāpo uswe twālyāmbíle ubumanyi bwa Bwānaloli, patikusyālápō nalimo kangi i likemo panongwa ya butukwanongwa.” Ifyo fyo Buku gwa Bahiburi ukutubūla uswe.

¹⁰⁰ Kangi lilino kētésya, bo uswe tukukēta ifimanyilo ifikulumba ifyakabalilo-kabumalikisyo nkísu, ifi Umwène áfíngíle, bo bwingipo bulebule ikyēne kikutusoka uswe ukuti akabalilo kali kifuki. Sōkāmo mu kusitakwítika. Isaga palikimo. Uswe tunganenege yumo nu nnine, nu kwítika, nukwípāgúla twíbéne ukufuma ku kisu.

¹⁰¹ Kētésya, abène bakāli itolo bākwísa palikimo nukuyobesania isya ndumi. Abène bāli bakuti bīse nkati mu kyēne, ukwisa pási pa lilopa. Komma ukwísa ukuyoba, “Umwe mumenye, Móse átubūlílíle uswe, untumigwa, umwène alinkuti, umwène átubūlílíle uswe ukuti uswe tubagíle ukuya ni lilopa. Ngimba umwe mukwinogona fiki ukufwana ni kyēne, balumyana?” Kila kikāli ikyēne mma. Ega kang’osi agogigwe, kangi egela ililopa pamwanya pala!

¹⁰² Uswe tubagíle ukwísa nukwitūgásya nukupilikana ni Lisyu, na kilikyosa ikingi, lōli tukaya ni Kikole, kyo kinunu nki ngimba ikyēne kikubōmba? Nakimo ikinunu. Yaga pási pa Ikyēne. Umwène akāli ni nongwa na aligwesa panja ukufuma pási pa lilopa lila. Kangi Umwene akaya ni nongwa kuli yumo umwisyugu, panja ukufuma pasi pa Kikole.

¹⁰³ Ikikola kyōsa, bāli baponesigwe pene pāpo abène bāli pási pa kikole, kangi i kikole kyābíkígwe pabwelu. Ikikolo kyosa! Ngimba umwe mukwitika ikyo? [Ikilundilo kikuyoba,

“Ameni.”—Nsimbi.] Umwisyugu uswe tubagile ukukumbukila ikyo, bāndu. Bana bitu!

¹⁰⁴ Kangi ubutubwa ubu ubwa butoyofu kangi butyonga, ni fīndu ifi uswe tukukīndamo, kangi bōsa aba apa baBeatles ni mbāni, kangi ngimba umwe mumenye ikyo kyo kyōsa kimililigwe apa mwa Būku, gwa i Bāngéli? Ilyēne likuyoba silasila mu Busetuli. Naloliloli, ikyēne kikuyoba. Mūmo abāndu, abēne, abēne bo—abēne bo. . . abēne, abēne, muketile, abēne, abēne bakaya. . . Abēne bo bafwe. Abēne bakabagīla ukusumuka. Abēne bakālīmo Basyepwa siku. Abēne bākālīmo na mu Linogono, popāpo abēne bisakupyūtīgwa. Abēne bisakumalisīgwa kwabwilanabwila, ukumalisīgwa lōsa. Abēne bisakufūdīgwa ku baaeoni ba kabalilo, pa ifi abēne babōmbīle, lōli kalikōsa aka kāli nu bwāndilo kali nu bumalikisyo.

¹⁰⁵ Ikyēne kyo kila iki kikaya nu bwāndilo, kikaya nu bumalikisyo. Buliko bumobwēne itolo uluko lwa Būmi Bwāsyēpwa. U luko lumolwene lwa Būmi Bwāsyēpwa, uswe tukusukulikila bula. Kētésya.

¹⁰⁶ Yoshua, untu gwa 2 gwa Yoshua, u Gwapanja umwitiki undongwe uyu āpilikisye, kangi ikikole kyāke, kangi ābatwēle abēne pāsi pa ndisi unkesefu, iki kyāli kikole ukufuma ku ntumigwa Yoshua. U Gwāndumi ugwakōnanga ugwe Kyāla alinkuyīndika ikikole kila, kangi kila kyēne, nkāya kala. Pala kwālipo ukulōnda kwa Kyāla, ukwisila mu bāmbombo Bāke, ukuti Kyāla ālondaga ikikole iki, kangi kila kyāli kyo kyēne. Une ndikupāsyā linga umwēne yo nkulumba gwa kāya, linga umwēne yo nnyambala mwikemo ukukinda nkāya, linga abēne bābukāga ku kipanga ikinywamu ukukīnda nkāya, kilikyosa nkāya kyāgwīle loli yi nyumba yila. Kyāla, pamwene, alinkuyīndika ikikole kila.

¹⁰⁷ Kētésya, Yeriko āpilike ukuti Kyāla ābōmbāga ifīndu ifikulumba, lōli abēne bakāpilikīle ubusoke bula.

¹⁰⁸ Momūmo bayīlīle abāndu umwīsyugu bikupilika iki Kyāla ābōmbāga ku fyīnja ifingipo ifi fikindile, lōli abēne batikupilikila ikyēne mma. Amaka amakulumba aga agaipyana ni fimanyilo, mūmo Umwēne āfingīle, “Mūmo kwāyīlīle mmasiku ga Sodomu, momūmo ukwēne kwisakuyaga.” Mūmo Umwēne āfingīle ikindu kila kisakuyaga! Kētésya iki kyābonīke mu Sodomu. Kumbukilaga, pala kyālipo ikimanyilo kya Sodomu. Lōli u ntumigwa, gwa Malaki 4, yo gwa “kwēga indumbula sya bāndu ukugomokela ku ba tātā, aba tātā bakipentekosti, ukugomokela ku i Bāngéli.” Likabagīle ukuyapo kangi i Bāngéli, ikindukimo ikingi. Ubu bo busetuli bōsa ubwa Kyāla.

¹⁰⁹ Kangi umunduyumo ikuyoba, “Mulimōsa, une ngwitika *iki*, une ngamanya nakimo ikya Ikyo.”

¹¹⁰ Untumigwa gwanaloli gwa Kyāla ikubagomokesya umwe ku Kīndu kyōsa! Muketile? Ketesya, ikyo kyo iki Mbepo Mwikemo ikubomba, ukubatwāla umwe ukugomokela ku Lisyu lililyōsa lya Kyala.

¹¹¹ Iliptyana Lyāke lināngisigwe, ubulōngi Bwāke bwāli bwakukōnga. Abēne bikufimbilisya ukwitikigwa ukuti abēne baponesigwe mu fiyūmba ifikulumba ifinywāmu ifwafipanga-gipāgūke abēne bāli nakyo mula mu Yeriko, lōli abēne balinkusyāgānia ukuti ikyēne kikābōmbāga mma.

¹¹² Pabagīle ukuyapo fimo mwa. . .lumo fyāfikīle nkati mula mu njila yimo, bālipo abalumiana babili bālīngīle nkati mula, kangi bābūligwe ukwēga yōsa imbeyu insunguligwengānīla palikimo. Kangi umwēne alinkufika. . .kangi umwēne alinkubōmbēla i nyumba yāke ukuya kipānga, kangi alinkwāmbilila abatūmigwa; kangi polelo alinkwēga bōsa nkāya kāke, aba bābagīle ukwītika, pāsi pa kikole.

¹¹³ Unkīkūlu yumoywēne mbukabi bwa kisu bōsa bula! Unkīkūlu yumoywēne unnini, kangi umwēne ugwa bufumuke ububibi, lumo asōsigwe ukufuma ku kipānga kilikyōsa nkāya, lōli umwēne ālītīke abatumigwa. Kangi untumigwa yula alinkuleka ikikole, ikimanyilo, kangi Kyāla alinkuyīndīka i kikōle. Momūmo kiyīlīle ikyāne umwīsyūgu. Kumbukilaga itolo, akabalilo kāko umbongotola gwa bugāsi gwa Kyāla uyu ālīsīle, ikipanganio ikinywāmu kila kilinkugwa, ikikōle kilinkukyūnga inyumba yāke mbuponesyo. Komma panongwa yakuti umwēne āli nkīkūlu nnuu; panongwa yakuti umwēne āli nu lwītīko kangi ābōmbīle imbombo ikikōle.

¹¹⁴ Lilino bule linga umwēne āyobīle, “Ena, bala bāli bāndu banunu, une naloliloli nālikyēlīle indumi abēne bapele, lōli, ukuyoba isyabwanaloli, ikyēne kikupilikigwa mu luko lwa butoyofu ukuya na kalisi kala kapayikigwe pa lilisya lyāngu, une ngukakwabilaga akēne nkati”? Ikyēne angali kigwīle. Ikyēne angali kigwīle. Kyāla āyindikāga kyēne i kikōle, kilakila ikikōle kya būmi kili mu Igupti.

¹¹⁵ Yoshua āli kyakwīmilīla Yeso, panongwa yakuti *Yoshua* kokuti “Yehova-mpoki.” Umwēne āli kyakwīmilīla kya Yeso, āli gwabwanaloli ku kikōle kimanyilo kwa ntumigwa gwāke ālumbilīle. Yoshua āsyēle gwabwanaloli ku kikōle kimanyilo. Fyosa pāsi pa ikyēne kyāpokigwe, mu Igupti. Fyōsa pasi pa ikyēne kyapokigwe, mu Yeriko.

¹¹⁶ I Lilopa lya Kang’osi lyo kyākwimilīla kya mwisyugu kya Kikōle, ukuti Mbepo Mwikemo yo Kikōle umwisyugu. Fyōsa pāsi pa Ikyēne kiponesigwe. Fyosa panja pa pāsi pa Ikyēne fikaya fiponesigwe mma. Mwa Bahiburi 13:10 kangi 20, Umwēne ikukōleligwa “ulwitikano ulwabwīlanabwila.” Ulwitikano ulwaiyolo lwāli kindu kimokyēne, ulu lo Lupya, ulu lo “lwitikano ulwabwīlanabwila.”

117 Kyāla, ifingo imbinyígwe-mu-Lilopa sya Kyāla, sikutupela uswe ukuya bābúke ukufuma ku butulwanongwa ni sóni, kangi bākíndáne na bōsa ba nkīsu. Ugwe utikulóndigwa ukufwāla nubukíndáne; aligwēsa abagíle ukufwāla nubukíndáne. Ugwe kufímbilisígwa ukuya, mu nkati, nkíndáne. U Būmi buli nkati; komma ukufwāla, ukwikūnga. “I Kitāngalala kya Kyāla kikaya kyākulya ni kyākunwa, pamo ukufwāla kwa myēnda; loli ikyene kyo bufisalyoyo, ubununu, ubololo, ukwikasya, mwa Mbepo Mwikemo.”

118 Lilino, ifingo sikupela ukuya mwābúke ukufuma ku butulwanongwa, sikunāngisya ukuti Kyāla aka—aka syāgánia ubutulwanongwa bwāko. Davidi āyobíle, “Nsayigwa u mūndu uyu Kyāla atisakūmilisya ubutulwanongwa kūko.” Kangi Kyāla atisakūmilisya siku ubutulwanongwa pa mwanya pa Kikole kila, panongwa yakuti i Kikole kyo kimanyilo ikihōmbígwe ukuti Kyāla ātalíle āmbilíle ikyēne. Kangi ugwe uli nakyo ikikóle pa kyēne, i . . . u lwítíko lwāko lutwēle ikyēne. Kangi ugwe uli nu ntengo gwakúlíla gwa butabulo bwāko mu mbili gwāko, ukumwípúta Umwēne nukunāngisya pānja ifingo Syāke na maka.

119 U *Lwítikano Ulupya* kokuti “ukwitikisania ukupya.” I *Lilopa* kokuti “Būmi.” U *Lwítikano Ulupya* lo lwítikano lwa Mbepo Mwikemo, u Mbepo Mwikemo ikupa ubukēti bwa iki Yeso Kristi asyusíse ukufuma ku bafwe, ānāngisye ukuti Yeso afwaníkíse ukulōnda kulikōsa panongwa ya uswe, kangi ali nu būmi umwísyúgu. I Kikóle kikusisimikisya ukuti Umwene mūmi ukwilinganísya Mwene na uswe, ukufwana ni lufingo Lwake. Lilino u mūndu abagíle bulebule ukubala i Bāngéli nukukēta ukuti Umwēne āfingíle ikyēne, nukukēta Kristi ikugomokela mmasiku agābumalikisyo aga nduko lwa Mbepo Mwikemo nukwilingania Mwēne mūmi? Ikyo kyo Kikóle. Ikyo kyo kimanyilo. Ugo go ntēngo guhōmbígwe.

120 Komma nasiku ukusūbila pa kwipikisya kumo. “Une nipilike ukutalala kukubopa ukukilania inyuma yāngu. Kangi—kangi une—une nānūngísye ikindukimo; nākētíle ililopa limo mfiboko fyāngu,” pamo amafuta gamo. Pamo—pamo, “Une mbōnjwíle i Digiri ya Bachelor.” Pamo, “Une nāmogíle mwa Mbepo. Une nāywēgíle. Une nāyobíle mu ndimi.” Ifindu fila fibagíle ukuya kanunu mōsa. Une ngaya nako nakomo akakulwana ni fyēne, lōli ikyo kyo kikaya iki une nguyobelapo.

121 Une nguyoba isya bulinganio bwa Kikóle, Yeso Kristi, asyusígwe kangi mwa uswe lilino, ikwilingánia Mwēne, ukusisimikisya—kangi i Lisyu Lyāke ilifingígwe ilya lisiku ili. Ameni. Polelo ugwe na Kristi muli yumo. Kyāla na Kristi yo yumo. “I lisiku lila, umwe mwisakumanya ukuti une ndi mwa Tata, u Tata mwa Une; Une mwa umwe, kangi umwe mwa Une.” Pala u Kyāla abonekíle mu mbili gwa būndu, ikwināngísya

Mwēne mūmi, ukufuma pa fyīnja maelifu mabili. Ikyo kyo Kikóle.

¹²² Linga umwe mukaya nkati, yaga nkati naloliloli nakalinga, bīnángu. Ikyēne lumo kyasyēpwa ukuya kukābila fiyo. Uswe tukamanya.

¹²³ Ukunāngīsa panja u Kuyapo Kwāke, Lwītíkano Ulupya, i Lilopa. Kangi Ilyēne lyūmi lilino, ukupela insisimikisyo. Kangi panongwa yakuti Umwēne yo ali, uswe tuli nu bwābúke ku kyōsa Umwēne ālyūlīle kuli uswe. Unnyambala uyu ali nu lōsyo lwa Mbepo Mwikemo, pamo unkikulu uyu ali nu lōsyo lwa Mbepo Mwikemo, ali nu bwābúke ku kilikyōsa iki Yeso ālyūlīle kuli uswe, kabuno kila kyo kimanyilo ukuti tuli nakyō. Ago go maka gākūlīla.

¹²⁴ Tuyoobe mukufwanisya, “Mulimosa, Nkundwe Branham, ngimba ugwe kusanusya fiki?”

¹²⁵ Apa, bikaga pabwelu lilino, kangi une ngulonda umwe mwe bāndu babine ukukipilikisya iki. Kēta, linga une nayaga ni njala ya kubufwe, kangi une mmenye ikimenya kya nkati, tutigi, kikūlīgwa ni mbwagaya malongo mabili na mahano, kangi pala ikwīsa u nkūndwe nukuyoba, “Apa silipo imb wagaya malongo mabili na mahano, Nkundwe Branham. Ugwe uli ni njala; ega i mbwagaya malongo mabili na mahano iyi.” Lilino, umwe mumenye, une mbagīle itolo ukuya itolo nsangulufu ni mbwagaya malongo mabili na mahano sila mūmo une mbagīle nu nkati nkiboko kyāngu, panongwa yakuti une ndinago untengo gwākūlīla. Une ndinakyo i kikóle iki kikwēga u nkati. Kangi palapala pala go nkati; kangi ikindu kyēne, une ngolelīle i kikóle, i mbwagaya malongo mabili na mahano isi sikūla u nkati, une mbagīle ukuya itolo nsangalufu ni kikóle mūmo une mbagīle nu nkati.

¹²⁶ Lilino, linga ugwe uli nu ulosyo lwa Mbepo Mwikemo, ikyo kyo Kikóle ukuti ugwe guli ni kundi kyosa ikyabutabule iki Yeso āfwīlīle, kya ugwe, ikyēne kili nkiboko kyāko. Ngima umwe mukutile ukukaba ikyēne?

¹²⁷ Linga une ngubīka mu nyāmbi yāngu, nukuyoba, “Mulimōsa, une ngamanya kali une mbagīle ukūla u nkati gula pamo mma,” une nisakuyaga ni njala mpaka bufwe. Lōli kumbukilāga, ugwakūlīsa ikuyoba, “Une ndinako ukulōndesya kumokwēne, Tata. Branham. U mbwagaya malongo mabili na mahano yumoywēne, ugwe ubagīle ukuya ni kimenya kya nkati.” Une ngabīle ugwēne! Ameni. Ikyo kikumasya ikyēne.

¹²⁸ Iyo yo nongwa uswe tutikukēta ifindu fingi fiyo fibubōmbigwa omwīsyūgu, i Kikóle kitikunāngisīgwa mma, i Kikóle ikyanaloliloli. O, uswe tuli nalo u luko lōsa lwa fisyoḃi, lōli une ngusanusya i Kikóle ikyanaloliloli.

¹²⁹ Kēta, polelo akabalilo kāko uswe tukusyāgānia nukunāngisya i Kikóle, u Būmi ubu ikyēne kyālyēgīle panongwa

ya Kikóle, i Lilopa likuyobela uswe. Kumbukilága, i Lilopa lya lwitikano lyályaganisígwe ni Kikole, kang'i i Lisyu likusisimikisya uswe isya lufingo. I Kikóle kyo kimanyilo ukuti ukúla kubōmbelígwe uswe.

¹³⁰ Lilino, linga ugwe ukabíkigwamo nkati mu kila, mulimōsa, ena, ugwe utisakukaba nakimo; ugwe kwēndeléla itolo mu lukindi lwa lwípúto, ukwēnda ukugomokela panja; ukwēnda ukufyúka ikigemo, kang'i ukukēta mmwanya, ukwēnda ukugomokela panja.

¹³¹ Lōli, o, nkundwe, akabalilo kāko i Kikole kila kināngisígwe itolo nkati mu yāko—yāko—yāko indumbula, kang'i ugwe umenye ukuti ikyēne kyo busyúke bwa Yeso Kristi mwa ugwe, ikindikimo kikubobeka. Kikayapo nakimo kikukusyumbutusyaga ugwe. Ugwe umēnye kúko ugwe ko kumyāko. Ukupilikila kōsa ku Lisyo lyōsa ilya Kyāla likukufwíka ugwe i Kikóle, kang'i nakimo ikīngi. “Nsayígwa yo umwēne yu ikubōmba syōsa isya Ngomelesyo Syāke, umwēne abagíle ukuya nu bwābúke ku Mpiki gwa Būmi.”

¹³² Polelo, akabalilo kāko uswe tukwípúta, uswe tukufimbilisígwa ukuya ni Kikóle ukutwāla palikimo ni nyīputo syītu. Lilino komma ukutólígwa ukupilikisya ikyo. Akabalilo kāko ugwe kwiputa, ugwe kufimbilisígwa ukuya ni Kikóle ukukōla pamwanya pa lwiputo lwāko; linga ugwe ukaya mma, umilisyāga mpaka i Kikóle kikwisa, 'nongwa yakuti ugwe ukafingilígwa ukwāmbilila ikyēne. Muketile, ugwe kufimbilisígwa ukuya ni Kikóle tāsī; ugo go ntengo gwakuhōmbéla, u lwítíko lwāko ukwítíka ikyēne.

¹³³ Lilino, ikimanyilo kya lupilikilo ulwisusye. Ulutēnde lukíndíle. Pauli ikutubūla uswe ukuti, “I Lilopa likuyoba ifindu ifinunupo.”

Ugwe kuyoba, “I Lilopa likuyoba?” Ena, I Lilopa likuyoba.

¹³⁴ Mwa Bwāndilo 4:10, uswe tukusyāgánia ukuti Kyāla āyobíle ukuti—ukuti Kaini yo. . . pamo, “ililopa lya Abeló likuyoba ukufuma nkīsu.” Uswe tukusyāgánia mu Bahiburi 12, ukuti, “I Lilopa lya lwitikano lwa Kristi likuyoba ifindu ifinunupo ukukínda lila ilya Abeló.” Muketile? Uswe tukusyāgánia, i Lilopa nalōli likuyoba, Ilyēne likuyobela mbuyo bwa ugwe. U Būmi ubu buli mwa ugwe bukuyoba ukufuma ku Lilopa ilyōneke. Amení. O, nkundwe! Une ngulonda aligwesa ukuketa ukuti ikyo. Muketile? Linga ugwe ubagile ukuketa ikyene, kyo Būmi ubu ugwe guli mwa ugwe. Muketile, i Lilopa lila lya likulíngánia ugwe ni Kyēne. Ikyēne kyo Kikóle. I. . . Iki ikyēne kili, i Lilopa lyályonelígwe panongwa ya ugwe; ugwe gwítíkísya, kang'i u Būmi bwísíle mwa ugwe. Ugwe guli ni Kikóle, ikyo kyo Mbepo Mwikemo.

¹³⁵ Polelo akabalilo kāko uswe tukwípúta, uswe tukufimbilisígwa ukuya ni Kikóle ukutwāla palikimo ni nyīputo

syĩtu, mũmo une njobĩle, kangĩ lilino itika kuli twĩbĩne nukubĩka i Kikóle ku kikolo kyōsa, bo mu Igupti, Yeriko, pamo lumu mu Imbombo 16:31. Uswe tukusyāgania ukuti Pauli ālimbũlĩle unsikali gwa kiRoma, alinkuti, “Itikaga ugwe, kangĩ nyumba yāko yōsa yisakupokigwāga.” Bikāga Ikyēne pa kikolo kyāko. Linga ugwe ulinayo u mwāna unsitakupokigwa, lāmbalika i Kikóle palapala pamwānya pa mwēne, yobaga, “Gwentwa Kyāla, une ngunkāba umwēne.” Syālāga palapala pala. Linga ugwe uli nayo u māma pamo unganigwa yumo uyu ayōngĩle, lambalika i Kikole pa bēne, yobaga, “Gwentwa Kyāla, une ngunkāba umwēne.”

¹³⁶ Syōsa panja, ifya fyōsa ifyafinyanyasi fya kĩsu, panja pa nyũmba yāko, yaga gwakwĩtendekēsya kuli Kyēne. Kokya ibundu syōsa isiũu. Tāga imesa sya njuga syĩnu panja. Pyāgilaga i ndundu sya ngāmba syĩnu. Tāga ubusitakwĩtika bwĩnu ni fikalatasi fya kipānga fyĩnu mbutāgĩlo ifinyanyasi, kũko ko buyo bwā fyēne. Amenĩ. Polelo ugwe gwāndile ukwĩtendekēsya. Polelo ngimba fiki kubōmba? Polelo paka i Kikole mu lwĩpũto, nu buketi bwanaloloi, u lwĩtiko lwanaloliloli. Paka Ikyēne, paka Ikyēne nu lusũbĩlo. Akabalilo kāko ugwe kupaka i Kikóle, mmanya ukuti ugwe usukĩgwe mōsa. “Linga indumbula syĩtu sitikututobesya uswe, polelo uswe tukukaba ubusũme bwĩtu.”

¹³⁷ Akabalilo kosa aka umwe mukubomba ifindu ifi fyo fisobi, umwe mukunsumaga bulebule Kyāla ukubōmba kalikosa kuli umwe akabalilo kāko umwe muli basobi? Iyo no nongwa uswe itolo tukupepeluka mōsa nukupepelukila kunyuma. Une ndikuyoba iki ukufulasya mma. Une nguyoba iki ukugolosa, ukupela ifindu ukuya fitalusye. Ngimba ugwe kuyēngaga bulebule pa lĩto lya Sodomu na Gomora yumo? Gomekela!

¹³⁸ Ifibũnganio na balumbilili fyĩtikĩsyē abāndu ukubōmba kalikōsa, nukukĩndĩlĩla itolo, kangĩ itolo ukubĩka ingamu pa bũku nukubakōlėla abēne *iki*, *kila*, kangĩ *ikingi*, napapo ikyēne kyo kikosyasoni. Kangĩ ikyēne kifikile ukuti ulwĩtiko lo kindukimo iki kikaya pōpe. . . nasiku nutubalilo twĩngi fiyo batikumanya iki ikyēne kyōpe kili. Abēne, abēne bali nu lusũbĩlo, lōli komma ulwĩtiko.

¹³⁹ Ugwe kufimbilisĩgwa ukugomokela, ukuti, kilikyōsa kisapulĩgwe nukupyāgilĩgwa. Polelo ugwe ega i Kikóle kyāko, ukuti ugwē umēnye ukuti ikyēne yo Yeso Kristi mwa ugwe, polelo paka Ikyēne. Linga ikindukimo kitikuboneka, kilipo kimo kisobi; gomokela kāngi, ulinakyo ikindu kimo ikisobii nkiboko kyāko. Umwene aafingile ikyene. Umwene aali Yũyo uyu aafingile ikyene. Pakaga Ikyene. Bala Baefesi 2:12, akabalilo kamo, linga ugwe—linga ugwe kulōnda, kangĩ ugwe kusyāgānia pala.

¹⁴⁰ Ketesya mu Bahiburi 9:11, yope. Pauli aayobile, “Ukumbombela Kyala, ni fyabusololi fyabũmi.” Ndikuyoba

itolo ngati une nābagile ukufyūka pamwanya bo mūmo u n’Hiburi ālisibīle ukubōmbēla, ukwēga ilikemo lyāke, nukusuluka pa nsebwe, ni ngambako inywāmu indupano, nukwāla amaboko gāke pa yēne nukwīlingania mwēne, nukōna ililopa, ukugomokela agolosigwe. Yehova ālondāga ikyēne. Umwene abobile ikyēne. Polelo ingulilo iyākukōnga, lumo abēne bāfikaga ukuya batalalifuko panini; umunduyumu uyungi, alinkuya ntalalifuko panini. Ikindu kyakwanda umwe mumenye, ikyēne kilinkwisa ukuya lwīho lwa kikolo.

141 Ikyo kyo iki pentekosti isile ukuya kwa uswe, ulwīho lwa kikolo. Uswe tukufika pāsi, tukuyoba, “Ngimba ikibonesyo kya televizioni kila kikāli kinunu fiyo ikilo iki? Kali abēne bayobaga isya fiki kula ku kipānga? Ntwa Yeso, bumbulusya. . .” O, kisa! Muketile? Ulwēne lo lwakikolo ulwih- . . . “Umwe mumenye, une nāyobīle mu ndimi ilisiku limo. Une ndi gwa *iki*, pamo *ikyō*, umwe mumenye. Aa-haa.” O, ulwēne lo lwīho lwa kikolo!

142 Umwe mumenye iki Kyāla āyobīle? Kyāla āyobīle, “Amafuta gīnu ni ng’osi sikununga mu mbulo yangu. Uko ko kotalusya, amakemo gīnu gisile ukuyu nkusyūlu.”

143 Kangi momūmo amakemo ga Pentekosti gayīlīle, ni sūnga nu kwēndendeka fyōsya fya fipanga-fipāgūke fyītu, na bakikulu bitu ba banyāmbāla ukubōmba injila iyi abēne bikubōmba, uluko lwa bunyakyāla; ukubomba ulwīmbo mōsa, kangi umunduyumo ukunyēla-nyēla pa kabalilo; kangi ikyēne kili paliposa, ngati indobo ya mīsi yisopīgwe pa kyēne, linga i Lisyu lya Kyāla likuboneka ukwīsa panja nukuyoba ikindukimo. Ngimba kitamisye fiki? Amakemo gīnu gāndīle ukunūnga pankyeni pa Yehova.

144 Kangi ikyēne kyāli pa kabalilo kala ukuti Yesaya alinkwīsa pa buyo, nukubabūla abēne, “Une nisakubapa umwe ikimanyilo ikyabwīlanabwila, umfunde isakuya nikifuba.” Muketile, mwaketa umwe lelo. Komma uluko lwa kufwa ni fimanyisyo, umma; lōli ubusololi bwabūmi, uKyāla ugwabūmi uyu asyūsīgwe ukufuma ku bafwe.

145 Fimo mwa fyēne, ifipanga ifi bo fila, ifi fikwītīka ifindu ifi, ifiyēne fikukāna ukuti kiliko kimo bo Kikóle. Mulimōsa, umwinitu yumo āgēlīle ukumbula uwe, “Bēne babafūndīgwa kalongo na babili bo balyāmbilīle Mbepo Mwikemo. Bo bēne bālīko. Ena.” O!

146 Lōli uswe twe tukwītīka i Lisyu, tumenye ukukīndana, uswe tumenye ukuti ubu bo Kuyapo kwa būmi. Kabuno uswe tumenye bulebule ukuti ikyene ko Kuyapo kwa Kristi, u Mbepo uyu ali pakati pitu? Ikyene kyo kindu kilakila iki Umwene ikubomba. Ubo bukēti bwa ikyēne. U mpesa gukumanyikīgwa ni fipaso ugwēne gukupapa. Kangi polelo linga umpesa gwakwānda gula gukwīsa pala kangi abēne bāsīmbīle u Būku gwa Imbombo ukufuma ku gwēne, kangi ikindu kilakila

iki Yeso ābombile, abatumigwa bābōmbíle; polelo akabalilo kākó umpesa gula gukutupuka kangí, ugwēne gukubōmba ikindu kilakila. Muketile, Abahiburi 13:8 ikuyoba Umwene yo yuyo, o, mwe, ikusisimikísya ukuti Kyala afyusisye mmwanya Umwene kuli uswe, ukufwana ni Lisyu Lyake ilifingigwe. [Ubuho busitakandu pa tepi—Nsimbi.]

¹⁴⁷ Ikimyato kya lufingo! Abaefesi 4:30 ikuti, “Somma ukunsulumanisya Mbepo Mwikemo gwa Kyala, kuko umwe mumyatigigwe mpaka ilisiku lwa kutabuligwa kwinu.” Komma mpaka ulusasanio ulukonge. “Mpaka pisiku lya butabulo bwínu!” Ukōsigwa mu Kyēne, ukufwana nu Bakorinti Gwakwanda 12. Kangi mwa Umwēne bo bwisusye, kangi nu butulwanongwa nabumo bukukētigwámo mwa Mwēne. “Umwēne yuyo apāpígwa mwa Kyāka atikubōmba ubutulwanongwa. Imbeyu ya Kyāla yikusyāla mwa umwēne, kangi umwēne akabagila ukutulwa inongwa.” Ngimba umwēne abagíle bulebule, akabalilo kākó i Kikóle kilipo? I Kikóle kyo kimanyilo umwēne itikisigwe.

¹⁴⁸ Kangi, mulimosa, ugwe kuyoba, “Une ngutulwa inongwa.” Ena, kokuti ugwe ukaalimo nakyo siku i Kikóle. Muketile?

¹⁴⁹ I Kikóle kyo kyakupínga, kikunāngisya ukuti untengo guhōmbígwe. Linga Setano ikugela ukukupako ikylene kwa ugwe. . . Inogona itolo isya iki. Linga Sētáno ikugela ukukupaka kwa ugwe ububíne bumo, pamo ikugela ukukupaka kimo kwa ugwe, ugwe umenye ikyakubomba? Nnāngisya umwēne i Kikóle. Nalóli, ububíne bukutika u Nkristi. Nnāngisya umwēne i Kikole, nukusisimikisya ku mwēne ukuti ugwe gwe kyōmbo ikyūligwe kya Kyāla. “Tātikanaga nu mōhesi, kangi umwēne isakubopaga ukufuma kwa ugwe.” Kolelela i Kikóle kyāko pamwanya pa lwítiko lusitakugutigwa mu Lisyu Lyāke ilifingigwe.

¹⁵⁰ Kyāla akabalilo kāmó āpéle ikimanyilo kya kipingafula. Une ngwígála. Ápéle ikimanyilo kya kipingafula ukuya kikole. Une ndinago itolo kifuki amaminiti kalongo, kangi polelo nguyaga nu lukíndi lwa lwípúto. Umwēne asyéle gwabwanalóli kwasyepwa ku kikóle kila. Bule Umwene? [Ikilundilo kikyuyoba, “Ameni.”—Nsimbi.] Umwene akáli ikubomba. Fyosa ifyinja amaelifu ifi, Umwēne nasiku, akabalilo kamo, ukutoligwamo ukunāngisya pabwelu ikyéne. Umwēne āli gwabwanaloli ku kikóle kila, kikunāngisya kwa uswe ukuti Umwēne siku. . . kangi atisakutoligwamo siku ukuyíndika ifikole Fyāke. Une ndikupāsyā linga ikyéne kyo. . .

¹⁵¹ Linga Yeso atikwisa ku finyinja maelifu kalongo, ugwe uli nakyo i Kikóle, Umwēne pōpe ikufimbilisígwa ukukiyíndika Ikyēne. Kali fyo findu filinga fikwāndúka, kangi kyo fiki ikíngi, Umwēne ikufimbilisígwa ukuyíndika i Kikóle kila. Umwēne āyobíle Umwēne ikubōmbaga. Umma ndaga. Umwēne

ikutugúlíla uswe lilino ukunāngisya pabwelu i Kikóle Kyāke, pamwanya pa lwítíko lwítu ulupígwe-na-Kyāla, ku kilikyōsa ikibugutila ikisitakwika nkíkolo kangu nkísu, iki kikwítíka ukuti ifimanyilo ni fiswígo fitikukōnga abítiki. Kangu yaga gwabwanaloli ku Kikóle iki, kangu Ikyēne kikunāngisya ukuti untēngo guhōmbígwe kangu uswe twitíkísígwe ku busyūke, tuli nu Bumi bwa Kikóle nkati mwa uswe.

¹⁵² Iyo yo Ndumi yakukéka, loli iyene bo Bwanaloli. Ikyo kyo iki uswe tukulonda, bo Bwanaloli. Kyala tutula uswe ukumanya u Bwanaloli. “Umwe mwisakubumanya u Bwanaloli, kangu u Bwanaloli bwisakubapela umwe bābúke.” Une ngwitúfyá ukuti Yeso Kristi yo yuyo mmayolo, umwisyugu, na bwilanabwila. Une ngwitika ukuti Kyala ikupa Mbepo Mwikemo ukuya bo Kikole, lululu lilino, itolo bo kukāli ukuyako ukusōka, kwa—kwa Nsingiligwa ukusōka ukufuma ku kipānga.

¹⁵³ Une ngwitika buliko ububole bwīngi fiyo, kangu abāndu bikuyoba abēne baywēgíle, abēne bayobíle mu ndimi. Une ngwitika mu findu ifyo; lōli ugwe ukabagíla ukusūbíla pa ikyo. Ugwe kusūbilága bulebule pa ikyo, nukukāna i Lisyu? Muketile?

¹⁵⁴ I Kikole kyo Lisyu lilinganisígwe mwa umwe, likuya nu būmi Lyene mōsa. Uyo yo Kyala ukuya ndingani Gwa Yuyo Mwene. Ugwe utikufimbilisígwa ukuyoba, “Ena, lilino, ugwe ulisanusya u lumili lwangu.” Ikyo kikaya ikyo mma. Umwēne ikulingania ubumi bwako ni Lisyu. Akabalilo kako Umwene ikwega ilisyu lyako, iki ugwe guli, kangu ukulīngānia i Lisyu Lyake ukwisila mula, patikulōndígwa ukuyapo ukulīngānia kulikōsa, ukwēne kutalile kulipa pala. Kyala ikubomba ululinganio Lwake Mwene, kangu uswe tuli nasyo ifingo isi isya lisiku ili.

¹⁵⁵ O, Dallas, umwe mwe kibugutila ikiganigwa kya baKristi, komma ukwēgígwa ukusōkapo ni findu ifi umwisyúgu, ifi umwe mukukēke fikusyūngutila, ’nongwa yakuti ikyēne kisapyūtígwa. Kina i Kikole kila akabalilo kōsa, nāngísya i Kikóle kila. Bala i Bāngéli. Isaga ku filifyosa. Kangu linga mbepo gwako mwa ugwe atikuyoba “ameni” ku Ikyo, polelo ugwe kinunupo ugomokele, andusya kila ugwe uli nakyō, panongwa ya Kikole; iki ugwe ukayanakyo Ikyēne.

¹⁵⁶ Une mmenye ikyo kyo fīndu fīngi ukuyoba amayolo aga. Kangu ikyēne kyo lululu lilino, buna-na-sinda. Akēne ko kabalilo lilino, kangu linga uswe tubagíle ukusōka pa sala ya buhano nu lukīndi lwa lwípúto.

¹⁵⁷ Ngimba ugwe kwitika ukuti Yeso Kristi gwabumi kangu ikulagila umwisyugu? [Ikilundilo kikuyoba, “Ameni.”—Nsimbi.] Ngimba umwe mukwitika iki une mbabulile umwe bo Bwanaloli? [“Ameni.”] Ikyene kyo Kikole, ikilōndígwe. Une mbagíle ukuyoba itolo iki kyo Bwānalóli. Une nguyoba itolo iki une ngukēta, iki une ngupilika, iki kikusetuligwa kwa une. Kangu nongwa ya fiki une nguyoba iki, aka tubalilo maelifu

kalongo ukōlosania na maelifu ga tubalilo, komma akabalilo kamo ikyēne kitoligwēmo siku ukuya kyabwanalōli, lilino ikyo kibagīle ukuya Kyala. Ikyo kibagīle ukuya yo Kyala. Mulimosa, ngimba Kyāla abagīle ukupa ubutumigwe bo ubo kwa munduyumo uyu akāmenye iki abēne bayobela ngapo? [“Umma.”] Ngimba Umwēne abagīle ukwilingānia Mwēne ukuya nketi yula pala, nukusyumbutuka nukumpa umwēne i Lisyu ilifuluganike? [“Umma.”] Umiana uyu akukupika Ikyēne, yo mwēne uyu afuluganike. Kangi Kyāla akaya mfuluganike. Kyāla yo ndinganii gwa Yuyo Mwēne.

158 Ambilila i Kikōle! Komma ukwigēmesya pa kwīngīla ikipānga kiliiyosya pamo uluko lulilōsa, pamo kalikōsa. Kaba i Kikole! Kikole Ikyēne. Ikyene kyo kindu kyene iki Kyala ikwisa kukitikisya. Akabalilo kāko ugwe kwīsa kula ku sala yila, akabalilo kāko ikyēne kikwisa ku bufwe bwāko, ugwe kinunupo ukolelele i Kikole kila pamwanya pa gwīmwēne; umēnye ukuti mu līsīku lya kwīsa Kwāke, ubusyūke bula, une mbāgīle ukutwāla nkyēni i Kikōle kila. Ikyēne kitisa kuyaga mu mbili ugu, ugwēne gubolīle mōsa; lōli mwa Mpepo uyu, yuyo akabagīla ukufwa, ikyēne kyo Būmi Bwasyēpwa, i Kikōle kikwigēmekēsya pala. Kangi Umwene aafingile, “Une ngwisakunsusya umwene kangi ku lisiku lya bumalikisyo.”

159 U Yeso Kristi yulayula ali apa. Umwene yo Ntumigwa. Umwēne yo . . . *Apa* yilipo i Ndumi, kangi Umwēne yo Ntumigwa apa ukulingānia i Ndumi Yāke. Une ngaya Ntumigwa ngaya. Umwene yo Ntumigwa, kangi *Iyi* yo Ndumi. Kangi linga ugwe uli ni mbepo iyi yikukānikana na *Ikyo*, iyēne yibagīle bulebule ukuya Ntumigwa gwa Ndumi? Kyēne ki Kikōle kisakulingānia Ikyēne. Amen.

160 Une ngwipilika ubwipūtīputi. Une naloliloli ngubomba. Une ngwīpilika ngati mbagīlr ukupululuka lilino ulu, kabuno une mmenye Uyu une nitike, kangi Une ngētīle ubūmi bwangu bulinganisiggwe mu Mwene mu busyusigwe Bwake. U Kuyapo Kwake kuli apa. Itikisya Ikyene, binangu, nālamba bōma, pāsi pa ndumbula syīnu.

161 Une mmenye uswe twesa tukwīsa kuno ukusyungutila ikigemo nukwīputa. Iyo fundo iyaiyolo ya kiMethodisti. Abēne bakābombilēmo ikyo mu li Bāngēli. Ili Bāngēli lyāyobīle, “Na bu bwīngi bwa aba bālītike balinkōsīgwa.” Uko ko kutalusya. Nakimo ikindu kimo bo kukōlēla ku kigemo mu li Bāngēli. Ikyo kyo kindukimo uswe twālyongēlīle, iki kyo kinunu mōsa. Kilikyosa Kyala ikusaya, ikyene kyo kilo kanunu.

162 Ngati abēne bikupaka utwēnda. Kikālīko ikindu bo ikyo mu li Bāngēli. “Abēne begaga ukufuma mu mbili gwa Pauli utwēnda ni fifūnga.”

163 Lōli mu njila yiliyosa ugwe kulonda ukubōmba ikyēne, nkikota kyako, ku kigemo, kilikyosa ikyēne kili. Ikindu kyēne

kyo, paka Kila, i Kikóle kwa ugwe. Polelo ikêta gwîmwéne môsa, kangî kêta lo luko luki ulwa bûmi ulu lukubômbigwa, kêta linga Ikyêne kipakígwe pamo mma. Linga Ikyêne kikapakigwa, polelo lambalikaga kilikyosa iki ugwe ulinakyo, palubafu, nukugomokela, mpaka i Kikóle kipakígwe.

¹⁶⁴ Unko uswe twîpúte. Tâta Gwakumwanya, lumu une—une—une njobile nubwengo, lôli, Ntwa, unsumali gukukolelega bulebule pene pâpo ugwe kukolelega ugwéne? Une ngusuma, Tata, ukuti ugwe ne gukolelege mu ndumbula ya bandu, ukuti abêne bisakukêta ukuti ikyêne kikaya kindu kyapamwanya mma. Ikyêne kikaya ukuti une ngugela ukulingania ikipânganio kimo, ikikolo kimo, ikibugutila kimo, u mündu ukimo, pamo nîmwêne, pamo aligwesa uyungi. Ikyêne yo Yeso Kristi. “Une nisakusopa ifipânganio fyosa fila palikimo,” ifyêne filipo fihano-na-kimo ifya kimokyêne kangî sinda gwa dazeni ikingî, ukufwana ni Lisyu Lyâko. “U mama ugwaiyolo undogwe,” i Bângéli mu Busetuli 17, “âli mâma gwa aligwesa gwa bamalaya bala.” Kangî abêne bakâbagîle ukuya nnyâmbala. Abêne bâli bamalaya, kangî abêne bôsa bâbükile nkitala kya bwâpanja. Kangî uswe tukuketa ikyene kukubômba ikyene, baPentekosti kangî bosa.

¹⁶⁵ Lôli, Yeso, Ugwe ukâli kusyâla yulayula Yeso. Baleka abêne bapilikisyége ku ndumi ya kipânga; lôli i Ndumi ya Kristi, i Lisyu. Ugwe ulilînganiâga Gwîmwéne, Ntwa, umwîsyúgu na bîteki. Babûmbulusya ababîne. Tuswege imbîbi syîtu, Ntwa. Une—une ngusûma, ukuya gwâmbombo Gwâko, ngulamba nswaga imbîbi syângu, kangî nswaga imbîbi sya bându aba. Une ngusûbîla, Ntwa. Aligwesa gwa bêne kisisa kwîlâmwa batûlîle mu fyâbupi, ukuhomba ku—ku liyûmba, kangî abêne batâgîle ihela syâbo, kangî abêne—abêne—abêne babômbîle kilikyôsa, Ntwa. O Kyâla, une ngusûma ukuti patisakuyapo na yumoywêne gwa bêne ikupôndwa ikyêne, Ntwa. Aligwesa gwa bêne alîbombaga!

¹⁶⁶ Une—une ngubômba ikyo nubwanaloli-ndumbula, kangî lôli, Ntwa, Ugwe kufîmbilisigwa ukuya nsita nkino. Uswe tumêne, ulufûndo lo lugano. U lugano lo lwalufûndo. Kangî une ngusuma. Panongwa ya nongwa yila ukuti Ugwe gwafûndîle abându Bâko, yâli nongwa yakuti Ugwe gwâbaganîle abêne, kangî ubutulwanongwa bulibosa bwafîmbilisigwâga ukwamuligwâpo.

¹⁶⁷ Kangî, Tâta, une ngusûma ukuti Ugwe kutuswaga imbîbi syîtu lilino, bo uswe tukwîlata isyêne. Uswe tuyôngîle kubutali, Ntwa. Une ndinganisigwe na bându ba kiPentekosti aba, Ntwa. Une—une ndi yumo gwa bêne. Kangî une—une ngusuma, Kyala, ukuti Ugwe kutuswaga uswe twesa. Kangî ega bâmo mwa balongosi aba nukubasanusya abêne ukusyûngutila, kangî—kangî unko abêne balikêtâga kubwa ku Kalvari kula akabalilo kamo, kangî abêne bisakwîbwâga isya iki abêne babagîle ukuya,

gwapresibeteri pamo u bishopu, pamo kilikyōsa iki abēne babagīle ukuya, nukumanya ukuti uswe tukaya banywamu bamo mma mu Kitangalala. Uswe twe twēsa bāna ba Kyāla. Une ngusuma ukuti Ugwe kututulaga uswe lilino. Ukwibonesya Gwimwene pakati pitu, umwisyugu. Uswe tukusuma mu Ngamu ya Yeso Kristi. Amen.

¹⁶⁸ Lilino itolo bo tukāli uswe ukwānda ulukīndi lwa lwīpūto, abagīle yumo apa akayamo siku apa. Une ngakumanya ukuti ugwe gwe ywāni, loli Kyala akumenye ugwe. Linga une njobile u Bwānalōli, unko Kyāla alīnganie ikyēne, kali ikyēne kyo Bwānalōli pamo mma, ikyo kyo busisimikisi bwa ikyēne. Linga Umwene asusigwe ukufuma ku bafwe, Umwene yo yuyo mmayolo, umusyugu, na bwilanabwila. Umwene āyobīle mwa Yohani 14:12, “Umwene uyu ikwitika,” komma umwene ikwipela ukwitika. “Umwene uyu ikwitika mwa Une, imbombo isi Une ngubomba isakubombaga yope.” Ngimba ikyo kitalusye?

¹⁶⁹ Umundu yumo āyobīle, “Ifikulumbapo umwe mwisakubōmbaga.” Uko ko kotalusya. Alinkuti, “Mulimosa, uswe tukulūmbilīla i Nongwainunu, ikyo kyo kikulumbapo.”

¹⁷⁰ Itolo bōmba ifindu Umwēne ābōmbīle, ikyo kisakusisimikisya ikyēne kwa une, muketile, polelo uswe twisakuyobaga isya fikulumbapo. Une mbagile ukubanāngisya umwe ifindu ifi ifikulumbapo Umwene ikubomba lilino ukukinda Umwene aabombile akabalilo kako Umwene ali pa kisu, kangī ikyo kikaya itolo ukulūmbilīla mma i Nongwainunu, pōpe; ikyo kyo mu fimanyilo ni fiswīgo. Nakabalilo nakamo pa ikyēne. Itikaga itolo. Kangī Kyala gwa ku Mwanya, Uyu afyusisye mmwanya Yeso Kristi ukufuma ku bafwe, kangī antwele Umwene gwābūmi apa, kwa uswe, ukufuma pa fyinja maelifu mabili, ukulīngānia i Ndumi iyi, ukuti Iyēne yo ndalusye. I Kikōle kikufīmbilisigwa ukupakigwa.

¹⁷¹ Lilino, umwe mwe muli ni mbungo ni ndamyō, sūma, itolo nindumbula-yosa yoba, “Gwentwa, une ngwitika ukuti Ugwe gwe ‘Mputi Nkulumba uyu abagile ukupalamasigwa nu bwipilike bwa bonywa bwitu.’ Kangī uswe tubūlīgwe nu ndumbilili apa, ukuti Ugwe uli na uswe, ulipo, polelo une ngulōnda Ugwe ukuya gwakuyapo na uswe nukwilīngānia Gwīmwēne.” Lilino sūma, aligwesa gwa umwe.

¹⁷² Lilino ikyēne kisyēle kwa Kyala ukuyoba ikindukimo. Ko kabalilo kaki! O, mwe! Une ngunyonywa umwe mwabagīle ukumanya ikindukimo, mūmo umwe mukwipilikila akabalilo kāko Kila kikwīsa, ikīsu kyōsa kyīnu. Amen. Nayumo u mōhēsi isakubōmbāga nakimo, umwēne yo kīndu ikiponjoligwe. U Ntwa gwāngu alipo. Ikyēne kyo kyōsa mmaboko gītu. Amen.

Ngulamba muyege naloliloli bakimyemye. Komma ukwendendeka. Itugasya kimyemye.

173 Umwe mwe muli nfikota fya magudumu, ni findu, komma ukwinogona mukuya bano ubutuli. Itika. Umwe—umwe, umwe mukĩndilemo mu ngĩndi sya lwĩpũto, kangi mutolĩgwe kangi mutolĩgwe. Ikyēne akāli ndumbilili uyu ābĩputĩle umwe, uyu ātolĩgwe. Ulwene lo lwitiko lwako, kangi ugwe kwānda ukwinogona ukuti ugwe ukaya nakyo nakimo ikyakubombapo. Ugwe kwitika.

174 Apa, apa lo Lumuli ulu apa, pamwanya pa nkĩkulu ugwalāngi unnini itugēsye kunyuma apa, imile na maboko gake mmwanya bo *ulu*. Ena. Ugwe gwĩputāga. Ena. Ugwe kunyitika une ukuya nsololi Gwake, pamo gwambombo Gwake? Une ndingayobaga ikyo, 'nongwa yakuti ikyēne kikutābānia abāndu fiyo. Ugwe uli ni nnunu. . .

175 Apa alipo u nnyambala umwēlu, unkĩkulu gwalāngi, itolo ngati ikyēne kyayĩlile u Ntwa gwĩtu nu nkĩkulu pa kisiba, uluko lubili ulukĩndāne. Umwēne alinkubaleka abēne ukumanya kukālipa ukukĩndāna mu luko. Ilangi syĩtu sikaya nakyo nakimo ikyakubōmba ni kyēne. Uswe twe twēsa. . . Uswe tubagĩle ukupāna ililopa. Kyāla āpelĩle, ukufuma ku lilopa limolyēne, ifikolo fyōsa.

176 Ugwe guli nu kubaba kwa mitu, imitu ukubaba fiyo. Polelo ugwe uli nu nsigo pa ndumbula yāko, ugo go panongwa ya mwana gwāko. Kangi ugwe. . . Ikyene kikukubilisye. [Kalumbu ikuyoba, “Ameni.”—Nsimbi.] Ikyo kyo katikati. Ngimba isi syabwanaloli? [“Ameni.”] Ikyo kyo kitalusye.

177 Unkĩkulu uyu itũgēsye ukukilania ukufuma kwa ugwe pala, umwēne ikufwana ukuya gwakwilĩngānia na ugwe, uyu yo mama gwako. [Kalumbu ikuyoba, “Ameni.”—Nsimbi.] Ikyo kyo kitalusye. [“Ntufye Kyala!”] Kangi umwēne ali nakyo ikindukimo kitamisye nu mwēne.

178 Ngimba ugwe kunyitika une, nkikulu? [Mama yula ikuyoba, “Ameni.”—Nsimbi.] Kwitika ugwe? Ulutamio lwāko ko ububabe mu lubafu lwāko. Uko ko kotalusya. Ulwēne lo lubafu lwāko ulwakukililo ulu lukubaba. Ngimba ikyo kitalusye? Fyusya mmwanya ikiboko kyāko, linga ikyo kitalusye. Ikyēne kitikuya pakukutamia ugwe kangi mma. Ugwe kwitika linga Kyala abagile ukumbula une ukuti ugwe gwe ywani? Nka. Lowell. [“Ameni.”] Kitalusye. [“Ameni.”] Syosa silikanunu, bukaga pa njila yako, Ntwa Yeso ikupa ugwe ubusume bwako.

179 Kulakula kubumalikisyo kwa kula aliko uyungi unnini unkĩkulu gwalāngi itũgēsye, ukukēta, ukuti itolo—itololo ngati ukuswanyula umwēne ndupātu. Umwēne ikukēta kunokuno kwa une. Umwēne ikwĩtika ikyēne. Ikyo, ngima mutikuketa kila Ikindu palapala kifuki nu mwene? Umwene ikukubilwa nu lutamio lwa figo. Uko ko kotalusya. Ulwēne lumalike lōsa lilino; Umwēne akubūmbulwisye ugwe. Ameni.

¹⁸⁰ Ngimba fiki umwe mutikwitika? “Linga ugwe ubagile ukwitika, fyosa ifindu fibagile.” Ngimba umwe mukwitika ikyo? [Ikilundilo kikuyoba, “Ameni.”—Nsimbi.] Papapa apa i . . . Keta ku bandu abalaangi! Ngimba luli kũgu u lwitiko lwĩnu, mwe bāndu bēlu?

¹⁸¹ Apa alipo unkikulu gwalāngi itugesye papapa apa, ikukēta kuno kwa une, afwēne nkikulu nywāmu. Umwēne ali nu lutamio na mafundo gāke. Umwēne kāngi ali nu lutamio, umwēne ali nulutamio lwa ndumbula. Ena. Kangi umwēne ali nu bōnywa, nukupepeluka ni findu bo fila, fiyofiyi akabalilo kāko ugwe kugela ukulāmbalala pāsi, ukutuyanika. Muketile? Ikyo kyābonike ikilo kya mmayolo. Kumbukilāga, une ndikubala ilinogono lyāko mma, lōli une mmenye iki ugwe gwiputilāga. Ugwe gwālōndāga ukukōleligwa ulwa iki, umwīsyūgu, kangi Umwēne āmwīle kuli ugwe. Lilino ugwe kāngi kutamigwa ukusumuka, panongwa yakuti ugwe uli ni mbungo ya fifupa. Uko ko kotalusya. Kangi polelo, ikindu ikīngi, ugwe uli nu lutamio lwa mūnda, iki kyo kimela nkati mūnda. Isyo syabwanaloli. Lilino ngimba ugwe kwitika une ukuya nsololi Gwake? Une nguyoba ikyene, mulimosa. Itika, kangi ugwe kuyaga kanunu mosa.

¹⁸² Bule isya lutamio *lwāko* lwa mūnda? Ngimba ugwe kwītika ukuti Kyāla isakukubūmbulusyāga ulutamio lwāko ulwa mūnda, gwitūgēsye pala, nūgwe? Ngimba ugwe kwitika ikyene? Umma ndaga, polelo ugwe ubagile ukuya nalo ulubumbulusyo lwāko. Ameni.

¹⁸³ Ugwe kulōnda ukuleka ukukwesa, apa, nkikūlu? Ugwe itika Kyāla isakukutēndēka ugwe ukuleka ukukwēsa? Gwagelaga akabalilo akatali fiyo. Ugwe uli nu lutamio lwa mūnda, nūgwe; gwāgelāga ukuleka indundu. Ikyo kyo iki kikipela ulutamio lwāko lwa mūnda. Ngimba kusilekāga isyēne? Une ngusibēnga isyēne ukufuma kwa ugwe, mu Ngamy ya Yeso Kristi, panongwa ya lwītiko lwāko ukumpalamāsya Umwēne.

Une ngusasasania umwe ukwitika Kyala!

¹⁸⁴ Apa alipo unkikulu unnini itūgēsye apa ukwīputila ugwāke. . . unganigwa yumo nkipatala, ikufwa, na kansa. Kotalusya. Umwēne yo jomba. Uko kotalusya. Ugwe gwe pamo. . . Ugwe gwe nkasi gwa ndūmbilili. Ugwe kwitika ni ndumbula yako yosa, unnyambala isakuyaga kanunu.

¹⁸⁵ Une ngusasanio umwe ukwītika Kyāla! Ngimba ikyo kyo fiki? Ikyo kyo kilīngānio kya Yeso Kristi. Umwe mukuyoba, “Ngimba u Kristi yo fiki?”

¹⁸⁶ Umwene yo Lisyu. “Ku bwandilo āliki Lisyu, u Lisyu aali na Kyala. Kangi i Lisyu lyapeliigwe ukuya mbili nukwītūgāsya na uswe.” “I Lisyu lipyasye kanunupo lyamaka ukukindapo ulubo ulu lupyasye-kosakosa, unketesyi gwa minogono ni fyamukati mu ndumbula.” Ngimba umwe muksbsgila ukuketa i Lisyu

lisile pakati pitu mmasiku ga bumalikisyo? Umwene yo Mbepo Mwikemo ukwega i Lisyu Iya Kyala nukulĩngania Yeso Kristi, iki kyo Kikóle. Ameni. Ngimba umwe mukwitika? [Ikilundilo kikuyoba, “Ameni.”—Nsimbi.]

¹⁸⁷ Balinga bali na makadi ga lwĩpúto? Unko bõsa pa lubafu *ulu* aba bali na makadi ga lwĩpúto, bĩme ndukindi ulwakukilania *apa*. Itolo ima, mwesa pa lubafu lula, itolo ulubafu lula ima pabwa apa mu nkolofwa. Umma, itolo pa nkolofwa lwa kiboko-ikililo, nalamba, palapala pala. Balongosi, ega ubuyo bwĩnu. Polelo akabalilo kãko abene bikumãlĩsya, unko abãngi basumukẽge, ukufuma pãpo abene bikwisa kuno, polelo ukusyumbutusa nu lubafu ulungi. Lilino uno aligwesa ayẽge gwaluyĩndiko.

¹⁸⁸ U Mbepo Mwikemo egile ulukomano, popãpo fyãli ifyakufwãna ifi fiyobĩgwe nukubõmbĩgwa ukusisimikisya. Balinga bikwitika Umwene ali apa? Balinga bikwitika ikyo kyo Kikole? Balinga bikwitika ikyene Iyo Lisyu? [Ikilundilo kikuyoba Nsimbi.] Keta, balinga amenye ukuti Buku gwa Bahiburi ayõbile, ukuti, “I Lisyu Iya Kyãla likwẽnesya aminogono aga gali mu ndumbula”? Balinga bamenye ikyo? Balinga aba bamenye ukuti iyo yo nongwa Yeso abagile ukwẽnesya aminogono mu ndumbula syãbo, panongwa yakuti Umwene ãli Lisyu? Balinga bakwitika ikyo? Balinga bikwitika ukuti kila kyo iki kyãli na basololi? Abene bãli bo bãbo i Lisyu lisaga ngako. Lilino linga i Lisyu likugomokela kwa uswe, ngimba Iyene litisakubõmba lulalula? Polelo libagile bulebule i Lisyu ili likulĩngania i Lisyu, ukuya lisobi ukwisila mu Lisyu? O, kisa! Baluyĩndiko!

¹⁸⁹ Hee, unkikulu uyu itugesye apa, umwene ali ni kindukimo pa ndumbula yake, yope. Une nãgĩgwe itolo ngusyumbutuka nukukola ikyene. Ngimba ugwe ukaya Nka. Grant? Une ngaamenyemo siku ikyo. Lõli ugwe gwe Nka. Grant, panongwa yakuti une ngukuketa ugwe ni yene. Ugwe uli nu lutende ulu lukukutamia ugwe. Ugwe guli nayo, umwanundumiana gwãko ali nakyo ikindukimo ikingi. . . ililopa lyãke, ngati, likõneka. Une ngukusasania ugwe ukwitika ikyene! Ameni. Umwe yo Fundi gwa bwitũgasye ubu. Umwene yo Fundi gwa bufwe.

Unko uswe twipute.

¹⁹⁰ Gwe Ntwa Yeso, akabalilo kako u Kuyapo Kwako kukutupaka uswe, apa mu nyumba iyi, kangi uswe tukusimanya uyu yo Mbepo Mwikemo, Une ngusuma, Ntwa, ukuti Ugwe kubumbulusya umundu aligwesa uyu ikufwalaga utufunga utu.

¹⁹¹ Akabalilo kãmo, uswe twãmanyisigwe mu li Bãngeli, ukuti abãndu Bãko, mulamula mu lukĩndi lwa mbombo, balobokaga Inyanja Ingeseфу, kangi inyanja yilinkuya mu njila yãbo, pa nsewe gwãbo ku kisu ikifingigwe. Kyãla alinkuketa pãsi ukwisila mu Mbanda ya Moto yila, na mãso amakalale,

kangi inyānja yilinkutíla, yilinkusegelela nyuma, kangi Israeli alinkubūka nkyeni ku kisu ikifíngigwe, mulamula mu lukíndi lwa mbombo.

¹⁹² O Ntwa Kyala, itikisya amaso Gāko gakēte ukwisila mu Lilopa lya Yeso Kristi, pāsi mu Kikóle iki apa iki uswe tukolelile pamwanya pa utufūnga utu umwīsyugu. Kangi aligwēsa uyu ikufwāla iki, ububine buliyaga nulutēnde, ubwēne busesemelaga kunyuma nukuleka abāndu Bāko ukuloboka ku lufingo lwa nukafu bununu. “Ulwiputo lwa lwitiko lwisakupoka ababine.” Mu Ngamu ya Yeso Kristi, ikyēne kiliyaga lululo. Ameni.

¹⁹³ Balinga bikwitika ba abalumbilili ba kiMethodisti bali muno, abalumbilili ba kiBaptisti, abalumbilili ba kiPresbeteri, abalumbilili ba kiBaptisti, ba kiLuteri, pamo kiPentekosti? Balinga ba umwe bikwitika Iki ukuya Bwanalóli? Isaga kuno nukwīma kifuki na une akabalilo kāko uswe tukwīpútíla ababine polelo. Isaga pamwanya apa, mwēsa umwe balūmbilíli aba bikwitika.

¹⁹⁴ Ikyene kyo kyosa kili kanunu, bule ikyene? Nkundwe Grant, ikyo kyo kutalusya? [Nkundwe Slaughter ikuyoba, “Naloliloli.”—Nsimbi.] Aa-haa.

¹⁹⁵ Isaga kuno, nkundwe. Nkundwe Grant ali nu butumígwe ukwīputíla ababine. Unyāmbala unkifu, unyāmbala unnunu, unyāmba uyu Kyāla ikumpilika nukummwamula ulwīpúto, Nkundwe Grant. Une ne nsangalufu ukubika ingongi syāngu ukusyūngutíla umwēne umwīsyúgu nukuyoba ikyo, kangi nkūndwe gwānu. Lilino umwēne ikuyaga pāsi apa ukwīputíla ababine na une.

¹⁹⁶ Akabalilo kāko umwe mukwīsa ukukinda ulukindi ulu, ngati itolo umwe mwīsága pāsi pa kipíngíka. Bakundwe, tendeka ungindi ibilo papapa apa, papa apa. Tēndéka ingindi ibili; bāmo pamwanya apa, bamo pāsi apa.

¹⁹⁷ Nkundwe Roy Borders, ngimba ugwe uki kūgu? Nkundwe Roy Borders, une ninogonaga umwēne āli apa. [Umunduyumo ikuyoba, “Umwēne ikugomokaga lululu ulu.”—Nsimbi.]

¹⁹⁸ Kēta kuno, ku balūmbilíli, umwe mubagile! Kēta kula. Ikyo kikapela une ukwīpilika kanunu, bakundwe. Ababombi ba kipíngíka, abanyāmbala aba bikwīma pamwanya apa ukwīlīgánia bēne ni Ndumi. Ngimba kibagíle ukuboneka kyo fiki?

¹⁹⁹ Lilino, kēta, komma ukukibika ba babōmbi lilino. Abēne bisile ukwīlīgánia bēne. Akabalilo kāko umwe mukukínda apa, ilingā-...koleléla i Kikóle pankyēni pa umwe, “Ntwa Yeso, une ndatile imbibi syāngu. Mukubwēsya, Ugwe umbēle une ulōsyo lwa Mbepo Mwikemo. Une ne kyōmbo ikyūlígwe. Ubutulwanongwa, ububine pamo nakimo kibagíle ukungolelela une ukufuma apa ukubūka nkyēni. Une ngwēnda kanunu.” Kolelela ikyo, o, pankyēni pa umwe, nukukínda apa, kangi

Kyāla isakukubūmbulusya ugwe kangi ugwe kwisa kubūkaga panja kusangaluka, gwe naho, kangi. Ngimba umwe mukwitika ikyene? [Ikilundilo kikuyoba, “Ameni.”—Nsimbi.]

²⁰⁰ Lilino aligwesa mu muno, unko uswe twinamisye imitu gyitu, nukwiputa. Uswe tukamanya iki kikubonekaga. Uswe itolo tukamanya. Yikayapo ni nongwa na yimoyēne iya mundu aligwesa umbine ukusōkamo mu nyumba iyi amayolo aga. Kolelela i Kikóle kila mu ndumbula yāko, kīnda kukīlilo ukwisila mu lukīndi lwa lwīpūto, kūko ababōmbi, aba bikemesisye imyumi gyābo ku—ku bubombelo, bikuyaga pakwīma apa, ukubīka amaboko pa umwe bo umwe mukukīnda ukwisila.

Ugwe kuyoba, “Ngimba fiki ugwe ubōmbile bo ulo, Nkundwe Branham?”

²⁰¹ Une ngulonda, aligwesa, ukumanya ukuti itolo. . . une ngaya mbumbulusyi mma. Abanyāmbāla aba bali nabo ubwābūke bu bunywamu ukufwana ukwiputula ababine bo aligwesa uyungī. Ukuyoba ubwanaloli, une ngwitika Kyāla ikwamulaga inyiputo syābo bo Umwēne akāli ilyāngu. Une ngatele kangi njaganīke, na filifyōsa. Une—une ngwitika ukuti Umwēne abagīle ukwamula inyiputo syābo. Kangi apa abēne bimile papapa nkati mwa ikyēne, ikwīlīngānia bēne, kisita kuyanisoni ukwēga ubuyo bwābo. Une ngupālisya unnyāmbāla bo ulo.

²⁰² Lilino, bakundwe, une mmenye ubwipilike bwīnu. Une ne, une ndi yumo na umwe. Une ne yone uyu alukile ulwēlo lwāngo na umwe, panja apa mu Texas, ukugela ukukola aligwesa gwa bēne iswi isi Kyāla abikīle ngani ku Būmi, panja pala. Une ngubōmba ikyāngu ikinunu-ukukīnda. Une ndina umwe, mia yumo kwa mia yumo. Utubalilo tuma une ngumanila nukuywēga isya fipāngānio ni findu. Ikyo kitikusanusya une ngulwana na umwe, bakundwe bāngu. Une ngusanusya une ngulwana ni mbātīko isi sibagīle ukupagulania uswe ukufuma ku bakundwe, panongwa ya kimanyisyo kya bwiputi kimo. Uswe tuli bakundwe ukwisila mu lōsyo lwa Mbepo Mwikemo. Uswe tukukolelela i Kikóle kilakila. Uswe twe twambilile i Lilopa lilalila, polelo unko uswe tukwitike ikyo. Uswe tubagīle ukwāgana Kula (bule uswe?), bakundwe, aligwesa gwa uswe pāsi pa Lilopa.

²⁰³ Lilino, une nabīkīgwe pa mbombo ukuya m’Baptisti. Lumo ugwe gwa kiMethodisti, pamo kiLuteri, pamo kiPresbeteri, kiPentekosti, kiOneness, kiTwoness, kiThreeness, pamo kilikyosa ugwe uli nakyo, Church of Go, kilikyosa ikyēne kili. Ikyo kitikupela nu bukīndāne bulibosa. Uswe tukabagīla ukupilikana pa tundu utunini tula, unko uswe twībwe isya ikyēne polelo.

²⁰⁴ Ikindukimo uswe tubagīle ukwitikisania, ukuti Yeso Kristi u Mpoki gwītu āfwīlīle imbībi syītu, āsyūkīle kangi kangi atupele uswe i Kikóle. Uswe twīmīle apa ni nyīpūto syītu,

ukukolelela pamwanya aba ababine abakundwe na bākalumbu aba bikukīnda ukwisila mu lukīndi. Une nguyapakusubila ikyene ni ndumbula yangu yosa.

²⁰⁵ Une nkibwēne ikindukimo kibonīke palapala pala. Ameni. Une mmenye umwe mukwinogona une nsyutil'untu, lōli une ngwipilika kanunu mbusyut'untu. Une ngusubila itolo une mbagile ukwima injila iyi. Ena, nkulumba. Une ngwipilika kanunukanunu itolo injila iyi.

Unko uswe twipute.

²⁰⁶ Ntwa Yeso, une ngusōkapo pa kigemo, pāsi apa, ukwīlīngānia nimwēne na bakundwe aba. Une ngwīlīngānia nimwēne na bēne, bo uswe twēsa tukukolelela i Fikōle fyītu mmaboko gītu, kangi mu ndumbula syītu. Bo uswe tukupilikila ubulagili Bwāko, “ukubīka amaboko pa babine, kangi abēne bisakubūmbulukāga.” Aligwesa u mundu uyu ikukīnda ukukilania apa, alitwālāga i Kikole kyābo, ukuti abēne bāmbilīle u Mbepo Mwikemo, ukuti abēne bo mwana umpāpīgwe-kabubili gwa Kyāla, ukuti abēne bakwītīka ikyēne ni ndumbula syābo syōsa. Kangi bo abēne bikukīnda ukukilania, abēne baligunaga imbungo yila nu bukubilwe nwa mbili gwābo. Kangi abēne balisōkāga panja pa apa basangalufu, bamenye ukuti ulwītīko lwābo lubatēndike abēne ukuya kanunu.

²⁰⁷ Kangi, Ntwa Kyāla, bo uswe twabīkīle, u Lwītīkāno Ulukūlu, amaboko gītu pa likemo, ukwīlīngānia twībēne ni likemo, uswe tukubika amaboko gītu pa Yeso nu kwiyanania twibene nu Mwene. Umwēne ābīkīle amaboko Gāke pa uswe lilno mu butumīgwe, ukwīlīngānia Mwēne na uswe, ukwisila mu fimanyilo ni fiswīgo. Kangi uswe tukubīka amaboko pa babine, ukwīlīngānia bēne na bēne, nu lwītīko lwītu lulūngisenie na bēne. Ububine bukufimbilisīgwa ukubūka, kangi ubwēne bulibōmbāga ikyēne mu Ngamu ya Yeso Kristi, bo uswe tukwēnda pāsi apa ukwāmbilīla ikyēne.

Unko ikilundilo kyosa kīpūte.

²⁰⁸ Roy pamo umundu yumo isaga kuno kangi ima kifuki ni kyakuyobelapo, kangi kyunga ingindi siyege ngolofu.

²⁰⁹ Kēta, bo umwe mukukīnda apa lilino, isaga mukwitika, isaga mukwīpūta. Uswe twisakubīkāga itolo amaboko pa babine. Isaga itolo ukukinda. Iputa. Akabalilo kāko ugwe kukīnda ukukilania ulukindi lwa babōmbi, linga ugwe kwēnda pa fitulakwēnda, filambalika ifyēne pāsi kangi sōkaga ngapo. Linga ugwe gwāli na kansa, ububine, yoba, “U dokotala abōmbīle kyōsa umwēne abagīle ukubōmba, umwēne abōmbīle kyōsa umwēne ābagīle ukubōmba, kangi umwēne atile une nguyaga pa kufwa. Une ndikufwamo mma. Apa kilipo i Kikōle kyāngu, Ntwa. Ugwe ufingīle une ifyinja malongo mahano na mabili. Une ngubūka itolo ukukīnda ukukilania apa, ngubōmba ikyēne.” Muketile, bōmba ikyo. Ngimba umwe mukubōmbaga isyene?

[Ikilundilo kikuyoba, “Ameni.”—Nsimbi.] Mu Ngamu ya Yeso, kili yaga bo mūmo icyēne. Ameni.

²¹⁰ Umma ndaga, unko ulukindi lukīndége. [Nkundwe Branham na babōmbi bikwīpūtīla ababine, bo unkundwe ikulongosya ikilundilo mu kwimba *Itika Itolo* ni nyimbo isingi. Ubuyo busitakandu pa tepi—Nsimbi.]

Une ngwitika!
 Syōsa inyīlamwe syāngu sisyīligwe mu
 Nyibuko.

²¹¹ Ngimba umwe mukwitika icyene? [Ikilundilo kikuyoba, “Ameni.”—Nsimbi.] Ameni. O, ngimba Umwene akaya gwakuswigisya? [“Ameni.”] Bamo mwa bēne bāli pa fikota fila ni fitala, balinkusumula itolo mmwanya nukwēnda ukusōkapo; itolo bafilekile ifyēne filambalele pala, nukwiēnda nukusōkapo. O, icyēne kyo aligwēsa abāgīle ukubumbulusīgwa lilino, uyu isakwitika icyēne. Ngimba umwe mukwitika? [“Ameni.”]

²¹² Unko uswe tupapo uswe ulusambo, *Une Nunganile Umwēne*, bule ugwe, kalumbu; ulwimbo ulwaiyolo, “Une nunganile Umwēne, Une nunganile Umwēne panongwa yakuti . . .”? Unko uswe twēsa tufyūsye amasyu gītu, na maboko gītu, indumbula syītu, kwa Kyāla, nukwimba, “Une nunganile Umwēne, Une nunganile Umwene, panongwa yakuti Umwene alinganile une tāsi.” Aligwesa lilino.

Une nunganile Umwene, une mbaganile
 Umwene
 Panongwa yakuti Umwene alinganile une
 Kangi ālyūlīle ubupoki bwāngu
 Pa Kalv- . . .

²¹³ Unkīkūlu, pamwanya ukusōka pa kikota kya magudumu, ikwēnda ukukilania apa nubutuli bwa banyāmbala babili. “Une . . .” Unko uswe tuyugānie amaboko gitu kwa Kyāla, “Une ngiganile Umwene!”

Une nunganile Umwene
 Panongwa yakuti Umwene alinganile une
 Kangi alyūlīle ubupoki bwāngu
 Pa gwa Kalivari . . .

Unko uswe itolo tuntufye Umwene lilino, aligwesa!

²¹⁴ Lwimiko kwa Kyala! Mumo uswe tukupalisya Ugwe, Ntwa Yeso, panongwa ya bununu Bwāko, u Kuyapo Kwako. O, uswe tukupalisya Ugwe panongwa ya Kikóle, Ntwa. Uswe tupokigwe nukwisusigwa nu Mbepo, u Mbepo Mwikemo ikunyāfila imibili gyītu lilino. Mumo uswe tukupalisya Ugwe panongwa ya iki, Tata! O, mu Ngamu Yeso uswe tukupalisya Ugwe. Ameni. Ameni.

²¹⁵ Aligwēsa ponania amaboko, yoba, “Ntufye u Ntwa!” Ponia ikiboko kya yumo nu mnine, yoba “Ntufe u Ntwa! Ntufye u Ntwa!” (. . . ? . . .) Fyosa filikanunu, lilino, filikanunu:

Une nunganile Umwēne,

Amaboko mmwanya, indumbula mmwanya.

Une . . .


Itolo kiyoba icyēne ukufuma mu ndumbula yāko.

Panongwa yakuti Umwēne alinganile une tāsi

(Ngima ugwe kutusatsiyāga?)

Kangi ālyūlīle ubupoki bwāngu

Pa mpiki gwa Kalvari.

²¹⁶ Lilino unko uswe twinamisye imitu gyitu nuluyīndiko, bo une ngusanusila ulukomano lilino kwa Nkundwe Grant ukuti atusātisye; ukupālisya aligwesa gwa umwe. Ikyākwānda, ukupālisya u Ntwa panongwa ya bununu Bwāke, ikisa Kyāke, kangi ubusisimikisi ukuti une ngusūbila ukuti uswe tulekile mu ndumbula syīnu, ukuti uswe tukaya apa patwībēne. Unkulumba u Mwalafyale Kapitao gwītu ali pakati pa uswe. Unjwego gwa Mwalafyāle guli nkisasa. Kangi uswe tukupālisya u Ntwa, ukukēta amaka Gāke amakulumba kangi ikisa Kyāke ikikulumba. Kangi lilino unko uswe twinamisye imitu gyitu nuluyīndiko. Nkundwe Grant. 

I KIKÓLE KYA64-0308

(The Token)

Ubulumbilili ubu butwaligwe nu Nkundwe William Marrion Branham, ubu pakwanda bwatwaligwe nki Ngereza pa Ndungu pamusi, Mariki 8, 1964, ku Tempeli ya Soul's Harbor mu Dallas, Texas, U.S.A., bwegigwe pa busimbe bwa tepi ya magneto kangi busimbigwe kisitakutumula mu ki Ngereza. Ukusimba ukwa mu Kyangonde ubu bwasanusigwe nu kuyabanisigwa na ba Voice of God Recordings.

KYANGONDE

©2022 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Ukusasania isya kwegwelelakwegelela

Ukusoka isya kwegwelelakwegelela. Ubwabuke bosa bukanisigwe. Ilibuku ili libagile ukubindikisigwa mfikalatasi pa kompyuta ya kunyumba ukuti ufibombelege imbombo yuyugwe pamo ukubayabilako abangi, kisita kuhombigwa, fiyege fyombo fyakubombela imbombo pakusasania Inongwa inunu isya Yeso Kristi. Ilibuku ili likabagila ukuulisigwa, pamo ukubindigwa ukuti gayege mingimingi, pamo ukusanusigwa pa webusaiti, pamo ukubikigwa mmakina agakusungasunga, pamo ukusanusigwa mu ndimi isingi, pamo ukulibombela imbombo iyakusyagilamo ihela kisita kwitikisigwa mwakalata unsimbigwe ugwa Voice Of God Recordings®.

Linga kulonda upilike inyingi pamo ifyombo ifingi ifi filipo ulisimbilaga ku:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org